

ДОНИЁР ПАЙҒАМБАРНИНГ КИТОБИ

Кириш

Мазкур китобнинг бош қаҳрамони Дониёр пайғамбардир. У иброний зодагонларининг оиласида таваллуд топиб, улғаяди ва милоддан олдинги 605 йилда бошқа асирлар қаторида шоҳ Навуҳадназар томонидан Бобилга сургун қилинади. Дониёр Бобил шоҳининг саройида хизмат қила бошлайди. Милоддан олдинги 539 йилда Мидия ва Форс қўшинлари Бобил таҳтини эгаллаганларидан кейин ҳам, Дониёр саройдаги хизматини давом эттиради.

Китобнинг биринчи қисмида (1-6-боблар) муаллиф бизга ўспирин Дониёрни ва унинг уч дўстини таништиради, уларнинг тиришқоқлиги, истеъоди ва диёнати ҳақида сўз юритиб, Бобил саройида юз берган ҳодисалар ҳақида бизни боҳабар қиласди. Шунингдек, жаҳон халқарининг тақдири ва Худонинг абадий ҳукмронлиги ҳақида сўз юритади. Ушбу китобда Дониёр ва унинг уч дўсти Бобил ҳуқуматида юксак обрў-эътиборга эга бўлганлари ҳақида ҳикоя қилинади. Уларнинг ҳаёти бир неча марта хавф остида қолади, шунга қарамай, улар Худога охиригача содиқ қолишади. Бобил шоҳлиги бирлашган Мидия ва Форс шоҳлигига мағлуб бўлгандан кейин, Дониёрнинг янги ҳуқуматга хизмат қилиши ҳам китобнинг шу қисмида баён қилинади.

Китобнинг иккинчи қисми (7-12-боблар) Дониёрга келган ваҳийлардан ва фаришта унга айтган ваҳий таъбирларидан ташкил топган. Бу ваҳийларда жаҳон халқарининг тақдири, яхудий халқининг келажаги ва Худонинг абадий ҳукмронлиги ҳақида сўз юритилади. Келажакда тарих саҳнасига чиқадиган буюк империяларнинг ҳукмронлиги ва яхудийлар уларга тобе бўлиши мажозий маънода баён қилинади. Ҳозирда биз ўтмишга назар ташлаб, бу ваҳийларнинг аксарият қисми амалга ошган, деб ишонч билан айта оламиз.

Хуллас, китобнинг асосий ғояси қуйидагилардан иборат: инсоният тақдирини Худо бошқаради. Худо шоҳликларни қудратли қиласди, вақти келганда эса уларни мағлуб қиласди. Тарих саҳнасига чиқсан буюк Бобил ва Форс империялари, енгилмас Искандар Зулқарнайн ҳокимияти ва Рим ҳукмронлиги келди-ю-кетди, Худонинг Ўз халқи орқали ўрнатган самовий шоҳлиги эса абадий барқарор турибди.

Дониёр ва унинг дўстлари бошидан ўтган воқеалар

(1:1-6:28)

1-БОБ

Ўспириналар шоҳ Навуҳадназар саройида

¹ Яхудо* шоҳи Ёҳайиқим ҳукмронлигининг учинчи йилида* Бобил шоҳи Навуҳадназар Қуддусга қўшин тортиб келиб, шаҳарни қамал қиласди. ² Раббий Ёҳайиқимни Навуҳадназарнинг қўлига берди*. Навуҳадназар Худонинг уйидаги айрим идишларни ўлжа қиласиб, Бобил* юргига олиб борди-да, идишларни ўз худосининг уйидаги хазинага жойлаштириди.

³ У саройнинг бош мулозими* Ашнапазга шундай буйруқ берган эди: “Исроил халқидан олинган асиirlардан шоҳ ва зодагонларнинг оилаларига мансуб бўлган

⁴ йигитларни олиб кел. Улар ёш, жисмонан соғлом, хушқомат, зеҳни ўткир, қобилиятили, фаросатли, хуллас, шоҳ саройида хизмат қилишга лаёқатли бўлишсин. Сен уларга бобил тилини* ва адабиётини ўргатишинг керак. ⁵ Ҳар кунги егулик билан шароб уларга менинг дастурхонимдан берилсин. Улар уч йил таълим олишгач, менинг ҳузуримда ҳозир бўлишлари лозим.”

⁶ Танланганларнинг орасида Яхудо қабиласидан бўлган Дониёр, Ханониё, Мишаил ва Озариё исмли ўспириналар бор эди. ⁷ Бош мулозим уларнинг исмларини ўзгартириб, Дониёрни — Белташазар, Ханониёни — Шадрах, Мишаилни — Мешах, Озариёни эса Абеднаху деб атади.

⁸ Дониёр шоҳона егулик ва шаробдан булғанишни хоҳламади*. Бу таомлардан у воз кечмоққа аҳд қилиб, бош мулозимдан бунинг учун ижозат сўради.

⁹ Худонинг иродаси билан Дониёр бош мулозимнинг мурувватию илтифотига сазовор бўлган эди. ¹⁰ Аммо бош мулозим Дониёрнинг таклифини эшишиб лол қолди ва деди: “Йўқ, егулик билан ичимликларни сизларга* шоҳ ҳазратларининг ўзлари белгилаганлар. Ҳазратимнинг буйруқларидан бош тортишдан қўрқаман. Борди-ю, қўринишларинг тенгдошларингнидан ёмонроқ бўлса, менинг жонимни хавф остига қўйган бўласизлар.”

¹¹ Кейин Дониёр бу масала хусусида бош мулозим тайинлаган соқчи билан гаплашди, чунки бу соқчи Дониёр ва унинг уч оғайниси учун масъул бир одам эди. У соқчига шундай деди: ¹² “Илтимос, қулларингизни ўн кун давомида синааб кўринг. Бизга егани сабзавот, ичгани сув беринг. ¹³ Кейин эса бизни шоҳона егуликни еган йигитлар билан солишириб қўринг, сўнг билганингизни қиласверинг.”

¹⁴ Соқчи рози бўлиб, уларни ўн кун давомида сабзавотлар билан боқди. ¹⁵ Ўн кун ўтгач, уларнинг гавдалари тўлишиб, шоҳона егулик еган бошқа йигитлардан анча қўркам бўлди. ¹⁶ Шундай қилиб, соқчи уларнинг шоҳона егуликлари ва шаробини ўзига олиб қолиб, уларга фақат сабзавотлар берадиган бўлди.

¹⁷ Худо бу тўртта йигитга адабиёт ва фалсафанинг ҳар соҳасини фаҳмламоқ учун билим ва истеъдод берган эди. Бундан ташқари, Дониёр турли хил ваҳий ва тушларни таъбирилаш қобилиятига эга эди.

¹⁸ Шоҳ белгилаган муддат тугагач, бош мулозим ҳамма йигитларни Навуходназар ҳузурига олиб борди. ¹⁹ Шоҳ уларнинг ҳар бири билан сухбатлашди. Улар орасида ҳеч ким Дониёр, Ханониё, Мишаил ва Озариёга тенг кела олмасди. Шунинг учун шоҳ уларни ўз саройида олиб қолди. ²⁰ Шоҳ қандай савол бермасин ва қандай жумбоқни ечишни сўрамасин, уларнинг билими ва донолиги бутун шоҳликдаги фолбину мунажжимларнидан ўн баробар зиёда эди. ²¹ Дониёр саройда шоҳ Куруш ҳукмронлигининг биринчи йилигача* хизмат қилди.

2-БОБ

Навуходназарнинг туши

¹ Навуходназар ўз ҳукмронлигининг иккинчи йилида* бир туш кўрди. Бу туш уни шу қадар безовта қилиб юбордики, қўзига бошқа уйқу келмади. ² Шоҳ тушининг таъбирини билиш учун қўли остидаги барча фолбин, мунажжим, сеҳргар ва афсунгарларни* чақирилди. Улар шоҳ ҳузурида ҳозир бўлганларида,

³ шоҳ уларга шундай деди:

— Мен ғалати бир туш кўрдим. Юрагимга ғулғула солган бу тушнинг

таъбирини билмоқчиман.

⁴ Улар шоҳга орамий тилида дедилар*:

— Шоҳ ҳазратларининг умри боқий бўлсин! Шоҳ ҳазратлари аввал тушларини айтсинлар, бу қулларингиз уни таъбирлашга тайёрдирлар.

⁵ — Билиб қўйинглар, — деди уларга шоҳ. — Агар менга туш ва унинг таъбирини айтиб бермасангиз, мен таналарингизни бўлак-бўлак қилдириб, сизларни жазолайман, уйларингизни эса вайрон қилиб, бир уюм тошга айлантираман. ⁶ Борди-ю, тушимни айтиб, уни таъбирлаб берсангиз, сизларга инъому мукофотлар бериб, иззат-икром кўрсатаман. Қани, энди менга кўрган тушимни ва унинг таъбирини айтиб беринглар!

⁷ Улар шоҳга иккинчи марта дедилар:

— Шоҳ ҳазратлари аввал тушларини айтсинлар, каминаларингиз уни таъбирлашга тайёрдирлар.

⁸ — Сизлар қарорим қатъий эканини кўриб, вақтни чўзмоқчисизлар, — деди шоҳ. — Буни аниқ билиб турибман. ⁹ Агар тушимни айтиб бермасангизлар, ҳаммангизга жазо битта! Сизлар мени лақиллатиб, вазият ўзгарунча вақтни чўзишга келишиб олгансизлар. Тушни менга айтиб беринглар, шунда уни таъбирлай олишингизни ҳам биламан.

¹⁰ — Ер юзида шоҳнинг бу талабини қондирадиган биронта жон бормикан?! — дея ажабландилар улар. — Шуҳрати рўйи заминга ёйилган шоҳларнинг биронтаси ҳам бундай нарсани на фолбин, на мунажжим, на афсунгардан талаб қилган. ¹¹ Шоҳ ҳазратлари биздан имконсиз бир нарсани талаб қиляптилар. Буни шоҳга фоний бандалар дунёсидан йироқ яшайдиган худолардан бошқа ҳеч ким очиб беролмайди.

¹² Дарғазаб бўлган шоҳ: “Бобилдаги барча сарой маслаҳатчилари қатл қилинсин!” — деб фармон берди. ¹³ Фармон эълон қилинди. Сарой маслаҳатчилари қатл қилиниш арафасида эди. Дониёр ва унинг ўртоқлари ҳам қатл қилинишлари керак эди.

Навуҳадназарнинг туши Дониёрга ошкор бўлади

¹⁴ Шоҳ соқчиларининг бошлиғи Ориёҳ сарой маслаҳатчиларини қатл қилмоқ учун йўлга чиққанда, Дониёр унинг олдига бориб, эҳтиёткорлик билан мурожаат қилиб: ¹⁵ “Эй Ориёҳ ҳазратлари, нима боис шоҳ бундай шошилинч* фармон чиқардилар?” — деб сўради. Шунда Ориёҳ бўлиб ўтган воқеани унга бирма-бир сўзлаб берди. ¹⁶ Дониёр шоша-пиша шоҳ ҳузурига кириб, тушнинг таъбирини топмоқ учун ҳазратларидан мухлат сўради. ¹⁷ Сўнг уйга бориб, бўлиб ўтган воқеани шериклари Ханониё, Мишаил ва Озариёларга айтиб берди: ¹⁸ “Сарой маслаҳатчилари билан бирга ҳалок бўлмаслигимиз учун, Самовий Худога илтижо қилинглар. У бизга раҳм қилиб, бу сирни очиб беришини сўранглар.”

¹⁹ Ўша кеча Дониёрга бу сир ваҳий орқали ошкор бўлди ва Дониёр Самовий Худога ҳамду санолар айтди:

²⁰ “Худойимиз доно ва қудратлидир,
Асрлар оша Унинг номи улуғлансин!

²¹ У замон ва даврларни ўзгартирас,
Шоҳларни тахтдан тушириб тахтга ўтқазар.
Донишмандларга донолик,
Оқилу фозилларга билим берар.

²² Пинҳон сақланган сирларни очар,
Зулматда яширинган нарсаларни билар,

Ёруғлик Унинг даргоҳида маскан топар.

²³ Эй ота-боболаримнинг Худоси,

Сенга шукурлар айтаман, мадҳлар қуйлайман,

Зеро, донолигу қудратни менга берган Сенсан,

Истаган нарсамни менга очган Сенсан,

Шоҳ тушини бизга ошкор қилган Сенсан.”

Дониёр шоҳга туш билан унинг таъбирини айтади

²⁴ Дониёр сарой маслаҳатчиларини қатл қилиш учун шоҳ томонидан тайинланган Ориёхнинг олдига бориб:

— Ҳазратим, сарой маслаҳатчиларининг жонларига зинҳор қасд қилманг, — деди. — Мени дарҳол шоҳ ҳузурига олиб киринг, мен шоҳ ҳазратлари кўрган тушни таъбирлаб бераман.

²⁵ Ориёх зудлик билан Дониёрни шоҳ ҳузурига олиб кириб:

— Эй олампаноҳ, каминангиз Яҳудо асиrlари орасидан тушингизни таъбирлаб берадиган бир одамни топиб келди, — деди.

²⁶ Шоҳ Дониёрга юзланиб (Дониёрнинг бошқа исми Белташазар эди*):

— Сен менга кўрган тушимни ҳамда унинг таъбирини айтиб бера оласанми? — деди.

²⁷ Дониёр шоҳга шундай жавоб берди: “Эй ҳазрати олийлари, на сарой маслаҳатчиси, на мунажжим, на фолбин, на раммол* бунинг уддасидан чиқа олади. ²⁸ Лекин самода шу каби, сирларни ошкор қила оладиган бир Худо бордир. У сизга, эй шоҳ ҳазратлари, охиратда бўладиган нарсаларни аён қилмоқчи. Сиз тушингизда кўрган ваҳий қуидагича эди:

²⁹ Эй олампаноҳ, сиз ухлаб, келажак ҳақида бир туш кўрдингиз. Бу туш орқали сирларни ошкор қилувчи Худо сизга келажакда рўй берадиган нарсаларни аён қилди. ³⁰ Бу сирнинг менга очилганлиги эса донолигим бошқаларнидан зиёда бўлгани учун эмас, балки шоҳаншоҳим кўрган тушининг таъбирини билиб, унинг маъносини тушунишлари учундир.

³¹ Эй шоҳ ҳазратлари, тушингизда сиз баҳайбат бир ҳайкал кўрдингиз.

Олдингизда турган ўша улкан ҳайкалнинг кўриниши ниҳоятда ярқироқ ва қўрқинчли эди. ³² Ҳайкалнинг боши тоза олтиндан, кўкрак ва қўллари кумушдан, бели ва сонлари бронздан, ³³ болдиrlари темирдан, оёқларининг бир қисми лойдан, бир қисми темирдан эди. ³⁴ Унга қараб турганингизда, тоғдан ўз-ўзидан* узилган бир тош думалаб келиб ҳайкалнинг лой ва темирдан бўлган оёқларига урилди-да, уларни парча-парча қилди. ³⁵ Темир, лой, бронза, кумуш ва олтин парчаланиб, ёзги хирмонлардаги тўпондай бўлди. Шамол уларни учирив кетиб, ҳеч бир асар қолдирмади. Ҳайкалга урилган тош эса катта тоғ бўлиб, бутун ер юзини қоплади.

³⁶ Бу сиз кўрган туш эди. Энди эса шоҳ ҳазратлари тушининг таъбирини эшитсинлар. ³⁷ Эй шоҳ ҳазратлари, сиз каби буюк ҳукмдорни дунё ҳали кўрмаган. Самовий Худо сизга салтанат, куч-қудрат ва шон-шуҳрат ато қилгандир. ³⁸ У сизга ерда яшовчи барча инсонларни, ҳатто даштдаги ёввойи ҳайвонлару осмонда учувчи қушларни тобе қилган, улар устидан ҳукмронлигинги мустаҳкам ўрнатган. Тилла бош — сизсиз. ³⁹ Аммо сиздан кейин жаҳон саҳнасига бошқа буюк бир шоҳлик чиқади. Бу шоҳлик сизнидан заифроқ бўлади. Сўнг ҳайкалнинг бронза бели ва сонлари билан ифодаланган учинчи шоҳлик ҳукмронлик қиласиди. ⁴⁰ Ундан кейин темирдай қаттиқ тўртинчи шоҳлик бўлади. Темир ҳамма нарсани синдириб йўқ қилганидай, ўша шоҳлик ҳам ундан олдинги шоҳликларни бузиб, йўқ қиласиди. ⁴¹ Сиз ҳайкалнинг оёқлари ва оёқ

бармоқларининг бир қисми лойдан, бир қисми темирдан эканлигини кўрдингиз, бу бўлинган шоҳлик бўлади. Лой билан темир бирга қорилгани учун бу шоҳлиқда бир оз темирнинг кучи бўлади.⁴² Шоҳлик айрим жиҳатдан кучли, айрим жиҳатдан заиф бўлади.⁴³ Темир билан лойнинг қоришмаси яна шундан далолат берадики, ўша замон ҳукмдорлари қуда-андачилик йўли билан шоҳликларини мустаҳкам қилмоқчи бўладилар, аммо темир лой билан қовушмагани каби, улар ҳам бир-бири билан қовуша олмайдилар.⁴⁴ Ўша шоҳларнинг даврида Самовий Худо битмас-туганмас бир шоҳлик ўрнатади. Ҳеч ким уни енга олмайди. Бу шоҳлик бошқа барча шоҳликларни ер билан яксон қилиб, ўзи абадий туради.⁴⁵ Тоғдан ўз-ўзидан думалаб тушиб, темир, бронза, лой, кумуш ва олтинни парчалаб ташлаган тош ўша шоҳликнинг ифодасидир. Буюк Худо сизга, эй шоҳ ҳазратлари, келажакда содир бўладиган нарсаларни аён қилди. Сиз қўрган тушингиз ҳақиқатан ҳам кароматли, таъбири эса рўйиростдир*.”

Шоҳ Навуҳадназар Дониёрни тақдирлайди

⁴⁶ Шоҳ Навуҳадназар мук тушиб Дониёрга сажда қилди. Сўнг одамларига Дониёр олдида назрлар келтириб, хушбўй тутатқилар тутатишни буюрди.⁴⁷ Шоҳ Дониёрга деди:

— Чиндан ҳам сенинг Худойинг сирларни ошкор қилувчи энг буюк Худодир, У шоҳларнинг ҳақиқий Эгасидир, чунки бу сирни менга фақат сен ошкор қила олдинг!

⁴⁸ Шоҳ Дониёрни юқори мансабга кўтариб, кўпдан-кўп инъомлар тақдим қилди, уни Бобил вилоятининг ҳокими ва сарой маслаҳатчиларининг бошлиғи қилиб тайинлади.⁴⁹ Дониёрнинг илтимосига биноан шоҳ Бобил вилоятининг бошқарувини Шадрах, Мешах ва Абеднахуга топширди. Дониёрнинг ўзи эса шоҳ саройида хизмат қилиб қолди.

3-БОБ

Навуҳадназар ясаттирган олтин ҳайкал

¹ Шоҳ Навуҳадназар соф олтиндан улкан бир ҳайкал ясаттириди. Баландлиги олтмиш тирсак, эни эса олти тирсак* бўлган бу ҳайкал Бобил вилоятидаги Дурах текислигига* ўрнатилди.² Сўнг қўли остидаги барча ноиблар, ҳокимлар, беклар, аъёнлар, хазинабонлар, қозилар, маъмурлар ва вилоятларнинг амалдорларини чақиртириб, ўрнатган ҳайкалнинг очилишида қатнашишларини буюрди.³ Бу барча амалдорлар* шоҳ Навуҳадназар ўрнатган ҳайкалнинг очилишига йиғилганларида,⁴ жарчи баланд овозда шундай эълон қилди: “Эй барча халқлар, элатлар ва уруғлар!⁵ Ҳозир созандаларимиз карнай, най, лира, чанг, арфа, доира ва бошқа чолғу асбобларини чаладилар, сизлар эса мук тушиб шоҳ Навуҳадназар ўрнатган олтин ҳайкалга сажда қиласизлар.⁶ Кимки мук тушиб сажда қилмаса, ўша заҳотиёқ оловли чуқурликка ташланади.”⁷ Чолғу асбобларининг* садоларини эшитгач, барча халқлар, элатлар ва уруғлар мук тушиб, шоҳ Навуҳадназар ўрнатган ҳайкалга сажда қилдилар.

Дониёрнинг уч оғайниси итоатсизликда айбланади

⁸ Яхудийларни қоралаш ниятида юрган айрим Бобилликлар* учун қулай бир вазият туғилган эди. Бундай фурсатни бой бермаслик учун улар ⁹ шоҳ Навуҳадназарга шундай дедилар: “Шоҳ ҳазратларининг умри боқий бўлсин!¹⁰ Эй шоҳ ҳазратлари, сиз берган амрингизга биноан чолғу асбобларининг садоларини эшитган ҳар бир одам мук тушиб олтин ҳайкалга сажда қилиши керак эди,

шундай эмасми?¹¹ Сиз, амримга итоат қилмаган ҳар қандай киши оловли чуқурликка ташланади, деб айтган эдингиз.¹² Аммо айрим яхудийлар, хусусан, сиз Бобил вилоятига ҳоким қилиб тайинлаган Шадрах, Мешах ва Абеднаху шоҳ ҳазратларининг амрига бўйсунмадилар. Бу одамлар худоларингизга сифинмайдилар, улар ҳатто сиз ўрнатган олтин ҳайкалга сажда қилишни ҳам ўзларига эп кўрмадилар.”

¹³ Бу хабардан ғазабланиб кетган Навуходназар Шадрах, Мешах ва Абеднахуни ўз хузурига келтиришни буюрди. Улар шоҳ хузурига келтирилганда,

¹⁴ Навуходназар уларга деди:

— Шадрах, Мешах ва Абеднаху, сизлар менинг худоларимга сифинмаганингиз ва мен ўрнатган олтин ҳайкалга сажда қилмаганингиз тўғрисида хабар топдим.

¹⁵ Аммо мен сизларга лутф айлаб яна бир имконият бераман. Ҳозир чолғу асбобларининг садоларини эшитишингиз биланоқ, мук тушиб мен ўрнатган ҳайкалга сажда қиласизлар. Акс ҳолда, ўша заҳотиёқ оловли чуқурликка ташланасизлар. Шунда сизларни менинг қўлимдан биронта худо ҳам қутқара олмайди!

¹⁶ Шадрах, Мешах ва Абеднаху шоҳга шундай жавоб беришди:

— Эй олампаноҳ, бу масалада биз ўзимизни оқламоқчи эмасмиз.¹⁷ Биз сифинадиган Худо бизни оловли чуқурлиқдан ҳам, сизнинг қўлингиздан ҳам қутқаришга қодир.¹⁸ Аммо У бизни қутқармаган тақдирда ҳам, билиб қўйингки, эй шоҳ ҳазратлари, биз ҳеч қачон худоларингизга сифинмаймиз, сиз ўрнатган олтин ҳайкалга ҳам сажда қилмаймиз.

Дониёрнинг уч оғайниси ўлимга маҳкум қилинади

¹⁹ Шадрах, Мешах ва Абеднахунинг бундай жавоби Навуходназарнинг қонини қайнатди. Унинг афти-башараси буришиб кетди. У оловни одатдагидан етти баробар қаттиқроқ ёндиришни буюрди.²⁰ Сўнг лашкари орасидаги энг кучли полвонларга Шадрах, Мешах ва Абеднахуни боғлаб, оловли чуқурликка ташлашни амр қилди.²¹ Полвонлар уларни боғлаб, устки кийими, иштони, бош кийими, хуллас, бутун уст-боши билан оловли чуқурлиқка ташладилар.

²² Газабланган шоҳ қаттиқ олов ёндиришни буюргани учун, алнга авжига чиққан эди. Оловнинг тафти уч оғайнини чуқурлиқка ташлаётган полвонларни кўйдириб юборди.²³ Шадрах, Мешах ва Абеднаху эса боғланган ҳолда оловли чуқурлиқка йиқилдилар.

²⁴ Буни томоша қилиб турган шоҳ Навуходназар бирданига ўрнидан сапчиб турди-да, ҳайрат ичра маслаҳатчиларига:

— Чуқурлиқка биз учта боғланган одамни ташламаганмидик? — деб ҳайқириб юборди.

— Худди шундай, шоҳ ҳазратлари, — деб жавоб берди улар.

²⁵ — Воажабо! Аланганинг ўртасида боғланмаган тўртта одам юрибди-ку, — деди шоҳ. — Уларнинг бирортасига ҳам зарар етмаган. Тўртинчи кимса худди илоҳий зотга* ўхшайди-я!

Учала йигит озод қилиниб, юқори лавозимга кўтарилади

²⁶ Навуходназар чуқурликнинг оғзига бориб:

— Шадрах, Мешах ва Абеднаху, эй Худойи Таолонинг хизматкорлари, қани, чиқинглар! Олдимга келинглар! — деб бақириди.

Шадрах, Мешах ва Абеднаху алнга орасидан чиқишиди.²⁷ Барча ноиблар, ҳокимлар, беклар ва шоҳ аъёнлари Шадрах, Мешах ва Абеднахуни ўраб олиб, олов ўша одамларга ҳеч қандай зиён етказмаганлигини қўришди. Уларнинг на соchlari

куйган, на устки кийимларига заарар етган, улардан ҳатто тутун хиди ҳам келмас эди.

²⁸ Навухадназар деди: “Шадрах, Мешах ва Абеднахунинг Худосига ҳамду санолар бўлсин! У йўз фариштасини юбориб, йўзига инонган қулларини халос қилди. Улар ўз Худосидан бошқа бўлган худоларга сифинишдан кўра, ўлимнираво кўрдилар, шу боис шоҳнинг амрига ҳам бўйсунмадилар.

²⁹ Шунинг учун фармоним қуидагичадир: Шадрах, Мешах ва Абеднахунинг Худосига шак келтирган ҳар бир одам қайси халқ, элат ёки уруққа мансуб бўлишидан қатъий назар, чопиб ташланади, унинг уйи эса вайрон қилинади. Зеро, бундай нажот берадиган бошқа худо йўқдир.”

³⁰ Кейин шоҳ Шадрах, Мешах ва Абеднахунинг мартабасини янада ошириб, уларни Бобил вилоятидаги юқори лавозимларга кўтарди.

Навухадназарнинг мактуби

³¹ Шоҳ Навухадназар ер юзидағи барча халқлар, элатлар ва уруғларга қуидаги хабарни юборди:

Хонадонингиздан барака аримасин! ³²Худойи Таоло менга кўрсатган аломату мўъжизалари ҳақида сизларни хабардор қилмоқчиман.

³³ Нақадар буюқдир Унинг аломатлари!
Нақадар қудратли мўъжизалари!
Унинг шоҳлиги — мангушоҳлик бўлар,
У абадий хукмронлик қиласар.

4-БОБ

Навухадназарнинг дараҳт ҳақидағы туши

¹ Мен, Навухадназар, ўз уйимда хотиржам, шоҳона саройимда роҳат-фароғатда яшаётган эдим. ² Аммо бир қуни кечаси кўрган тушим юрагимга аллақандай ваҳима солди. Бу тушим мени даҳшатга туширган эди. ³ Мен тушимнинг таъбирини билишни истаб, Бобилдаги ҳамма сарой маслаҳатчиларини хузуримга келтиришни буюрдим. ⁴ Қаршимда ҳозир бўлган фолбин, мунаҷжим, афсунгар* ва раммоллар* тушимни эшитдилар-у, аммо уни таъбирлай олмадилар. ⁵ Ниҳоят, Дониёр келди (унинг Белташазар деган исми* мен сифинадиган худонинг исми билан ҳамоҳангдир*). Дониёр муқаддас худоларнинг руҳи* билан тўладир. Мен унга тушимни айтиб бердим: ⁶ “Эй Белташазар, фолбинларнинг бошлиғи, сенда муқаддас худоларнинг руҳи* борлиги менга аён, ҳар қандай сир сенга ошкордир. Кўрган тушимнинг таъбирини менга айтиб бер.

⁷ Тушимда мен дунёning қоқ ўртасида ўсаётган бир дараҳтни кўрдим. У ниҳоятда улкан эди. ⁸ Дараҳт ўсиб, унинг уни осмонга етди. Дараҳтни дунёning тўрт бурчагидан туриб кўрса бўлар эди. ⁹ Унинг япроқлари ниҳоятда чиройли, мўл мевалари бутун дунёни таъминлар эди. Ёввойи ҳайвонлар унинг тагида пана топар, осмондаги қушлар шохларида ин қурад, ер юзидағи барча мавжудот ундан озиқланар эди.

¹⁰ Мен тўшагимда ётиб, келган ваҳийни томоша қилаётганимда, осмондан кузатувчи бир фаришта тушиб келди. ¹¹ У баланд овозда бақирди: «Дараҳтни йиқитинглар, шохларини чопиб ташланглар, япроқларини узиб, меваларини сочиб юборинглар. Тагидаги ҳайвонларни

ҳайданглар, шохлардаги қушларни учиринглар. ¹² Аммо дараҳтнинг тўнкаси ва илдизларига тегманглар, уларни темир ва бронза билан занжирлаб, майин дашт ўтлари орасида қолдириинглар. Дараҳт тимсолидаги бу одам осмондан тушган шудрингга чўмилсин, ёввойи ҳайвонлар билан яшаб, насибасини дашт ўтлари орасидан териб есин.

¹³ Ундан инсон онги олиб ташлансин. У етти йил* мобайнода онгсиз ҳайвондай яшасин. ¹⁴ Кузатувчи фаришталар шу хукмни чиқаришди, токи ҳар бир мавжудот Худойи Таолони инсон салтанатининг ягона Ҳукмдори деб билсин. У шоҳликни хоҳлаган одамига берар, хокисор қашшоқни тахтга ўтқазар.»

¹⁵ Мен, шоҳ Навуҳадназар, кўрган туш мана шудир. Энди сен, Белташазар, менга тушимнинг таъбирини айтиб бер, чунки сарой маслаҳатчилари уни таъбирлай олмадилар. Сен эса бунинг уддасидан чиқасан, чунки сенда муқаддас худоларнинг руҳи* бор.”

Тушнинг таъбири

¹⁶ Сўнг Белташазар, яъни Дониёр бир қанча вақт ўзига келолмай турди. Менинг тушим уни даҳшатга туширган эди. “Белташазар, тушим ва унинг таъбири сени даҳшатга солмасин, — дедим унга мен*.”

“Ҳазратим, — деб гапини бошлади Белташазар. — Илойим, бу тушингиз ва унинг таъбири душманларингиз бошига тушсин! ¹⁷ Сиз, учи осмон билан ўпишган баланд бир дараҳтни кўрдингиз. Бу дараҳт шу қадар улкан эдики, уни дунёнинг тўрт бурчагидан туриб кўрса бўлар эди. ¹⁸ Унинг япроқлари ниҳоятда чиройли, мўл мевалари бутун дунёни таъмин қиласин эди. Тагида ёввойи ҳайвонлар яшар, осмондаги қушлар шоҳларида ин қуарар эди. ¹⁹ Ўша улкан дараҳт — сизсиз, эй шоҳ ҳазратлари! Сиз ер юзида ҳокимииятингизни ўрнатиб, шуҳратингизни осмону фалакларга ёйгансиз.

²⁰ Тушингизда сиз, эй ҳазрати олийлари, осмондан тушиб келаётган кузатувчи фариштани ҳам кўрдингиз. Фаришта: «Дараҳтни йиқитиб, йўқ қилинглар», деб буйруқ берди. «Аммо тўнка ва илдизларига тегманглар, уларни темир ва бронза билан занжирлаб, дашт ўтлари орасида қолдириинглар. Етти йил давомида у осмондан тушган шудрингга чўмилиб, ёввойи ҳайвонлар билан бирга яшасин.»

²¹ Туш таъбири шундайдир: Худойи Таолонинг амрига мувофиқ, буларнинг барчаси келажакда бошингизга тушади. ²² Сиз инсонлар жамиятидан ҳайдалиб, ёввойи ҳайвонлар орасида яшайсиз. Худойи Таоло инсон салтанатининг ягона Ҳукмдори эканини ва У тахтни хоҳлаган одамига беришини англаб етмагуningизча етти йил давомида молга ўхшаб ўт еб, осмондан тушган шудрингга чўмиласиз. ²³ Аммо дараҳт тўнкаси ва илдизлари қолдирилганлиги шундан далолат берадики, сиз Худони Олий Ҳукмдор деб тан олганингиздан кейин, шоҳлигинги қайта тикланади.

²⁴ Ўтинаман сиздан, эй шоҳ ҳазратлари, маслаҳатимни рад этманг: гуноҳларингиздан юз ўгириб, тўғриликни маҳкам тутинг, ёмон қилмишларингиздан воз кечиб, эзилганларга илтифот қилинг. Ким билсин, балки шунда давлатингиз равнақи давом этар.”

Навуҳадназарнинг туши ўнгидан келади

²⁵ Буларнинг ҳаммаси менинг бошимга тушди*. ²⁶ Ўн икки ойлардан кейин, мен, Навуҳадназар, Бобилдаги саройимнинг томида сайр қилиб юрган эдим*. ²⁷ Шунда шаҳарга назар ташлаб: “Ўз қудратим билан курдирган шоҳона пойтахт Бобилни бир кўриб қўйинглар-а! — дедим, —

чексиз кучим ва дабдабали улуғворлигим бу шаҳарда акс эттирилган.”

²⁸ Бу сўзлар оғзимдан чиқиб улгурмаган ҳам эдики, осмондан бир овоз келди: “Эй шоҳ Навуҳадназар, гапимга қулоқ сол! Сен тахтингдан туширилдинг! ²⁹ Сен инсонлар жамиятидан ҳайдалиб, ёввойи ҳайвонлар билан яшайсан. Худойи Таоло — инсон салтанатининг ягона Ҳукмдори эканини ва У тахтни хоҳлаган одамига беришини уқмагунингча, етти йил давомида молга ўхшаб ўт еб юрасан.”

³⁰ Менга айтилган бу кароматли сўзлар ўша заҳотиёқ амалга ошди. Мен инсонлар жамиятидан ҳайдалдим. Мол каби ўт еб, осмондан тушган шудрингга чўмилдим. Сочларим бургут қанотларидаи узун, тирноқларим күшнинг чанглларидаи бўлгунига қадар, ҳаётим шу зайлда давом этди.

Навуҳадназар Худони олқишилайди

³¹ Белгиланган муддат тугагач, мен кўзимни осмонга тиқдим, ўша заҳотиёқ эс-хушим ўзимга қайтиб келди. Мен Худойи Таолога шукроналар айтдим, мангу яшовчини олқишилаб, улуғладим:

“Зеро, абадийдир Унинг ҳукмронлиги,
Авлодлар ошадир Унинг шоҳлиги.
³² Ердаги инсонлар Унинг наздида ҳеч нарсадайдир,
Инсонлару малакларга У ҳукмини ўтказгайдир.
Бирор кимса Унга бас кела олмас,
«Нима қиляпсан?» — деб сўрашга журъат этмас.”

³³ Эс-хушим ўзимга қайтиб келганидан сўнг, шоҳлигим, обрў-эътиборим ҳамда шуҳратим тикланди. Маслаҳатчи ва бекларим мени қидириб келишди. Мен қайта тахтга ўтиридим, улуғворлигим эса олдингидан ҳам ошди.

³⁴ Энди мен, Навуҳадназар, Самовий Шоҳга ҳамду санолар айтаман, Уни улуғлаб, шарафлайман. Унинг ҳамма ишлари тўғри, чиқарган ҳукмлари адолатлидир, У димоғи шишганларнинг попугини пасайтиришга қодирдир.

5-БОБ

Белшазарнинг зиёфати

¹ Орадан йиллар ўтди. Бир куни шоҳ Белшазар^{*} катта бир зиёфат уюштириди, зиёфатга мингта бегини таклиф қилиб, улар билан майхўрлик қилаётган эди.

² Ширақайф бўлиб қолган шоҳ: “Катта бобом^{*} Навуҳадназар Қуддусдаги Маъбаддан олиб келган олтин ва кумуш қадаҳлар^{*} келтирилсин!” — деб буюрди. Шоҳ беклари, хотинлари ва канизаклари^{*} билан ўша қадаҳлардан шароб ичмоқчи эди. ³ Қуддусдаги Маъбад, яъни Худонинг уйидан олиб келинган олтин қадаҳлар базмхонага келтирилди. Шоҳнинг ўзи, унинг беклари, хотинлари ва канизаклари қадаҳлардан шароб ичишди. ⁴ Улар ичиб, олтин, кумуш, бронза, темир, ёғоч ва тошлардан қилинган худоларни олқишилар эдилар.

⁵ Тўсатдан одам қўлининг панжаси пайдо бўлиб, шоҳ саройининг деворларидаги сувоқнинг устида ёза бошлади. Сарой чироқлари деворнинг ўша қисмини яхши ёритиб тургани учун, шоҳ ёзаётган қўл панжасини қўриб қолди.

⁶ Шоҳ бундан даҳшатга тушиб, бўзариб кетди. Унинг қўллари бўشاшиб, тиззалири титрай бошлади. ⁷ Шоҳ бақириб, мунажжим, афсунгар^{*} ва раммолларни*

келтиришни буюрди. Улар ҳозир бўлганларида, шоҳ шундай деди: “Ким бу ёзувни ўқиб, унинг маъносини менга тушунтириб берса, мен ўша одамнинг устига шоҳона сафсар тўн кийгизаман, бўйнига олтин занжир тақиб, чап қўл вазирим* қилиб тайинлайман.”⁸ Шоҳнинг бу маслаҳатчилари ичкарига кирганларидан кейин ҳам ёзувни ўқий олмадилар, унинг маъносини ҳам тушунтириб бера олмадилар.⁹ Бундан қаттиқ ваҳимага тушган шоҳ Белшазарнинг рангида ранг қолмади, беклари эса талмовсираб қолишиди.

¹⁰ Ичкаридаги шовқин–суронни эшитиб, базмхонага кирган она малика*: “Шоҳ ҳазратларининг умри боқий бўлсин! — деди. — Шоҳим, шунчалик ҳам қўрқасизми, қаранг, ахир, рангингизда ранг қолмабди-ку!¹¹ Сизнинг шоҳлигингизда муқаддас худоларнинг руҳига* тўлган бир одам бор. Катта бобонгиз даврида бу одам идрокли, зеҳни ўткир ва худолар каби доно деб тан олинган эди. Катта бобонгиз — шоҳ Навуҳадназар уни фолбин, мунажжим, афсунгар ва раммолларнинг бошлиғи қилиб тайинлаган эдилар.¹² Дониёр исмли бу одам тушларни таъбирлашда, сирларни очища ва жумбоқларни ечишда ғайритабий қобилият, билим ва фаҳм–фаросатга эгадир. Катта бобонгиз уни Белташазар деб атаган эди*. Шоҳим, буюринг, Дониёрни бу ерга келтиришсин, у сизга бу ёзувнинг маъносини тушунтириб бергай.”

Дониёр ёзувни тушунтириб беради

¹³ Дониёр шоҳ хузурига келтирилди. Шоҳ Дониёрдан: “Катта бобом Яхудодан асир қилиб олиб келган Дониёр сенмисан? — деб сўради. — ¹⁴ Сени худоларнинг руҳи* билан тўлган, идрокли, зеҳни ўткир ва доно деб эшитдим.¹⁵ Мен маслаҳатчилар ва мунажжимларни хузуримга чақиртириб, уларга мана бу ёзувни ўқиб, маъносини тушунтириб беришни буюрган эдим. Аммо уларнинг биронтаси ҳам бунинг уддасидан чиқа олмади.¹⁶ Сен эса жумбоқларни ечиб, уларни тушунтира олишингни эшитганман. Агар сен ҳозир бу ёзувни ўқиб, унинг маъносини менга тушунтириб берсанг, мен сенинг устингга шоҳона сафсар тўн кийгизаман, бўйнингга олтин занжир тақиб, чап қўл вазирим қилиб тайинлайман.”

¹⁷ Дониёр шоҳ хузурида шундай жавоб берди: “Эй олампаноҳ, раҳмат, совғаларингиз ўзингизда қолаверсин ёки уларни бошқа бировга бера қолинг. Мен бу ёзувни шундоқ ҳам ўқиб, унинг маъносини тушунтириб бераман.

¹⁸ Эй шоҳ ҳазратлари, Худойи Таоло катта бобонгиз Навуҳадназарни буюк бир салтанатнинг таҳтига ўтқазиб, шуҳратини рўйи заминга ёйгандир.¹⁹ Худо унга берган улуғворлиги туфайли ҳамма одамлар — қайси халқ, элат ва уруғдан бўлишларидан қатъий назар, катта бобонгиздан қўрқиб қалтирас эдилар. У хоҳлаган одамни ўлдирав, хоҳлаганини тирик қолдирав, юксалтироқчи бўлганини юксалтирав, хор қилмоқчи бўлганини оёқ ости қилас эди.²⁰ Аммо мағрурланиб, ўжарлиги илиа иш тута бошлагандага шоҳона таҳтидан туширилиб, улуғворлигидан маҳрум қилинган эди.²¹ У инсонлар жамиятидан ҳайдалиб, онгиз ҳайвондай бўлиб қолганди. Ёввойи эшаклар билан яшаб, мол сингари, ўт билан озиқланган ва осмондан тушган шудрингга чўмилганди. Охири Худойи Таоло инсон салтанатининг ягона Ҳукмдори эканини ва У таҳтини хоҳлаган одамига беришини катта бобонгиз тан олган эди.

²² Аммо сиз, эй шоҳ Белшазар, катта бобонгизнинг бошидан ўтган бу воқеалардан хабардор бўла туриб* Худога бўйсунмадингиз!²³ Сиз ҳаддингиздан ошиб, Самовий Худога қарши бош кўтардингиз! Худо Маъбадининг қадаҳларини хузурингизга келтириб, бекларингиз, хотинларингиз ва канизакларингиз билан майхўрлик қилдингиз. Ҳеч нарса кўрмайдиган, ҳеч нарса эшитмайдиган, ҳеч

нарса билмайдиган олтин, кумуш, бронза, темир, ёғоч ва тошдан ясалган худоларни мадҳ айладингиз. Аммо сизга ҳаёт берувчи ва охиратингизни белгиловчи Худони улуғламадингиз.²⁴ Шунинг учун Худо қўл панжасини юбориб қуидаги сўзларни ёздирди:

²⁵ МЕНЕ, МЕНЕ, ТЕКЕЛ ва ПАРСИН*.

²⁶ Бунинг маъноси қуидагича:

МЕНЕ, яъни «ҳисоб» — Худо ҳукмонлик вақтингизни ҳисоблаб чиқиб, шоҳлигингизга якун ясади.

²⁷ ТЕКЕЛ, яъни «тортилган» — сиз тарозида тортилиб, ҳукмонлик қилишга номуносиб бўлиб чиқдингиз.

²⁸ ПЕРЕС, яъни «бўлинган» — шоҳлигингиз бўлинниб, Мидияликлар ва Форсларга берилди*.”

²⁹ Сўнг Белшазар берган амрга биноан, Дониёрга шоҳона сафсар тўн кийдирилиб, бўйнига олтин занжир тақилди ва у шоҳнинг чап қўл вазири деб эълон қилинди.

³⁰ Худди ўша куни кечаси Бобил* шохи Белшазар ўлдирилди*. ³¹ Тахтга эса олтмиш икки ёшли Мидиялик Доро* ўтирди.

6-БОБ

Дониёр шерлар уясида

¹ Шоҳ Доро* бутун шоҳлигидаги ерларни 120 та вилоятга бўлиб, ҳар бир вилоят устидан ноиб тайинлашга қарор қилди. ² Ноибларни назорат қилиш учун эса учта амирни тайинлади, уларнинг бири Дониёр эди. Шоҳни уринтирумаслик учун улар ноиблардан барча ҳисботни олишлари керак эди. ³ Дониёр бошқа амиру ноибларга қараганда ўз ишини юксак маҳорат билан бажарар эди. Шунинг учун шоҳ бутун салтанат бошқарувини Дониёрга топширишни режалаштириб қўйганди. ⁴ Буни кўра олмаган амиру ноиблар қилдан қийиқ ахтариб, Дониёрнинг бошқарув ишларидағи нуқсонларни топишга ҳаракат қилишди. Аммо Дониёр ўз ишини пухта бажариб, ҳеч қандай масъулиятсизлик ва ноҳақликка йўл қўймасди. Шунинг учун уни айблашга бирон-бир баҳона ҳам топа олмадилар. ⁵ Ниҳоят улар бир-бирларига шундай дедилар: “Дониёрни фақатгина ўз Худосининг қонуни билан боғлиқ бўлган ҳолда айблашимиз мумкин, бундан бошқа чорамиз йўққа ўхшайди.”

⁶ Шунда амиру ноиблар шоҳнинг ҳузурига бориб: “Шоҳ Доро ҳазратларининг умри боқий бўлсин! — дедилар. ⁷ — Шоҳликнинг барча амирлари, беклари, ноиблари, аъёнлари ва ҳокимлари шундай деб ўзаро келишиб олдилар: шоҳимиз фармон жорий қилсинлар. Эй шоҳ ҳазратлари, бу фармон бўйича ҳамма одам ўттиз кун мобайнода фақатгина сизга сажда қилсин. Кимки бошқа бир худо ёки одамга сажда қилса, шерлар уясига ташлансин. Бу фармон қатъий равища амалга оширилсин. ⁸ Эй шоҳ ҳазратлари, фармон чиқариб уни имзоланг. Бу фармонинг Мидия ва Форс қонунларига биноан ўзгармас бўлсин.” ⁹ Шоҳ Доро фармонни имзолади. ¹⁰ Дониёр фармон имзоланганлигини била туриб уйига борди. Болохонасига чиқиб, ҳар доим қилганидай, кунига уч маҳал тиз чўкиб Худога илтижо қилди, Уни мадҳ этиб улуғлади. Болохонанинг деразалари эса Куддус томон очилган эди.

¹¹ Амалдорлар бир тўда бўлиб Дониёрнинг уйига боргандарида, Дониёр ўз Худосига илтижо қилаётганини кўриб қолдилар. ¹² Улар зудлик билан бу ҳақда шоҳни хабардор қилиш учун шоҳ ҳузурига бордилар.

— Эй шоҳ ҳазратлари! — дея мурожаат қилди улар. — Сиз фармон чиқариб, кимки ўттиз кун ичида мендан бошқа биронта худо ёки одамга сажда қиласа, шерларнинг уясига ташланади, деб айтмаганимдингиз?

— Ҳа, чиқарган бу фармоним Мидия ва Форс шоҳлигининг қонунларига биноан, қатъийдир, — дея жавоб берди шоҳ.

¹³ — Эй шоҳ ҳазратлари, Яхудо асиrlаридан бўлмиш Дониёр сизни ҳам, сиз чиқарган фармонингизни ҳам менсимай, кунига уч марта ўз Худосига илтижо қиляпти, — деди улар.

¹⁴ Шоҳ буни эшитгач, қаттиқ ташвишга тушди. У Дониёрни сақлаб қолиш ниятида кун ботгунга қадар, кўлидан келганича ҳаракат қилди. ¹⁵ Аммо амалдорлар шоҳнинг олдига келиб:

— Шоҳ ҳазратлари, Мидия ва Форс қонунларига биноан, сиз чиқарган ҳар бир фармон ўзгармас эканлигини эсингизда туting, — дедилар.

¹⁶ Шоҳ Дониёрни шерларнинг уясига ташлашни буюрди.

Дониёрнинг ўзига эса: “Сени Худойинг қўлига топширдим, сен доим сажда қиладиган ўша Худо сени асрасин”, — деди.

¹⁷ Тош келтирилиб, чуқурликнинг оғзи беркитиб қўйилди. Ҳеч ким Дониёрни шерлардан қутқара олмасин деб, шоҳ ўзининг ва амалдорларининг тамғалари билан тошни муҳрлаб қўйди. ¹⁸ Сўнг саройига қайтиб, кечаси билан туз тотмади. Одатдаги кечки вақти чоғлиқ ҳам кўнглига сиғмай, туни билан ухламай чиқди.

¹⁹ Эртаси куни тонг отгач, шоҳ шоша-пиша шерлар уяси томон югорди. ²⁰ У ерга боргач:

— Ҳой Дониёр, барҳаёт Худонинг хизматкори! — дея куйиниб хитоб қилди у.

— Сен доимо сажда қилиб юрган Худойинг сени шерлардан қутқара олдими?

²¹ — Шоҳ ҳазратларининг умри боқий бўлсин! — деди шоҳга Дониёр. ²² — Худойимнинг назарида бегуноҳ бўлганим учун У фариштасини юбориб, шерларнинг оғизларини беркитиб қўйди ва шерлар менга ҳеч қандай зарар етказмадилар. Сизнинг олдингизда ҳам, эй шоҳ ҳазратлари, мен бирон-бир айбли иш қилган эмасман.

²³ Хурсандчилиги ичига сиғмаган шоҳ Дониёрни чуқурликдан чиқаришни буюрди. Дониёрни чуқурликдан чиқарган одамлар унга ҳеч қандай зарар етмаганини кўришди, чунки Дониёр Худога инонган эди. ²⁴ Шоҳнинг буйруғига биноан, Дониёрни қоралаган одамларни хотину бола-чақалари билан бирга шерлар уясига ташладилар. Улар чуқурликнинг тубига етмаган ҳам эдики, шерлар уларга ташланиб ғажиб ташлашди.

²⁵ Шоҳ Доро бутун дунё бўйлаб барча халқлар, элатлар ва уруғларга шундай мактуб йўллади:

“Хонадонингиздан барака аримасин! ²⁶ Шоҳлигимдаги барча одамлар Дониёрнинг Худосидан кўрқиб титрасин, чунки

У барҳаёт ва мангу Худодир.

Унинг шоҳлиги асло қуламас,

Ҳукмронлиги ҳеч ҳам тугамас,

²⁷ Нажоткору халоскор Удир.

Еру кўқда аломату мўъжизалар кўрсатган,

Удир Дониёрни шерлардан қутқариб олган.”

²⁸ Шоҳ Доро ва Форс шоҳи Курушнинг хукмронлиги даврларида* Дониёрнинг мартабаси яна ҳам ошди.

Дониёр кўрган ваҳийлар (7:1-12:13)

7-БОБ

Дониёрнинг тўрт махлуқ ҳақидаги ваҳийси

¹ Бобил шоҳи Белшазар хукмронлигининг биринчи йилида* Дониёр бир туш кўрди. У кўрган туши ҳақида шундай ёзди:

² “Мен тушимда бир ваҳий кўрдим. Осмоннинг тўрт томонидан эсаётган қаттиқ шамол улкан бир денгизни тўлқинлантираётган эди. ³ Ўша денгиздан бир-бирига ўхшамайдиган тўртта баҳайбат махлуқ^{*} чиқди. ⁴ Биринчиси шерга ўхшаган эди, унинг бургут қанотларига ўхшаган қанотлари бор эди. Мен махлуқни томоша қилиб турган эдим, бирданига қандайдир бир куч унинг қанотларини узиб ташлади, ўзини эса кўтариб одамзодга ўхшатиб икки оёғида турғизиб қўйди. Ўша махлуққа инсон онги берилган эди*.

⁵ Иккинчи махлуқ айиққа ўхшар эди. У оғзига учта қовурға суюкларини тишлаб олган эди. У ҳамла қилишга шайлана бошлагандা, унга шундай буйруқ берилди: «Қани, ол, тўйгунингча гўшт егин!»

⁶ Сўнг қоплонга ўхшагани пайдо бўлди. Бу махлуқнинг тўртта боши ва орқасида қуш қанотига ўхшаган тўртта қаноти бор эди. Унга хукмронлик қилиш ҳуқуқи берилган эди.

⁷ Бундан кейин тундаги ваҳийда мен қўрқинчли, даҳшатли ва бениҳоя кучли бўлган тўртинчи махлуқни кўрдим. У ўз курбонларини темир тишлари билан ғажиб, парчалаб ташларди. Қолдиқларини эса оёқлари билан босиб эзарди. Унинг ўнта шоҳи бўлгани учун, у олдинги махлуқлардан ажралиб турар эди. ⁸ Мен махлуқнинг шоҳларини томоша қилиб турганимда, уларнинг орасидан ўсиб чиқаётган яна бир шоҳчани^{*} кўрдим. Унга жой бериш учун олдинги ўнта шоҳдан утаси таг-туги билан узилиб тушди. Бу янги ўсиб чиққан шоҳнинг инсон кўзларига ўхшаган кўзлари ва такаббуона гапирадиган оғзи бор эди.

Дониёрнинг Азалий Нуроний ҳақидаги ваҳийси

⁹ Мен таҳтларнинг жой-жойига ўрнатилганини томоша қилиб турдим, Азалий Нуроний*. Ўз жойига ўтириди. Унинг кийими қордай оқ, соchlари эса оппоқ момиқдай эди. Унинг таҳти оташин алнга, таҳтининг ғилдираклари ловуллаган олов эди. ¹⁰ Унинг ҳузуридан оловли дарё оқиб чиқди. Минглар Унга хизмат қиласи, ҳамма китоблар^{*} очилди.

¹¹ Кичкина шоҳнинг кибрланиб шанғиллаши менинг эътиборимни тортган эди. Мен уни томоша қилаётганимда ўша тўртинчи махлуқ ўлдирилди, унинг жасади оловга ташланиб, куйдириб юборилди. ¹² Қолган махлуқларга келсак, уларнинг хукмронлиги йўқ қилинди, аммо ҳаётлари маълум бир вақтгача^{*} сақлаб қолинди.

¹³ Тунда келган ўша ваҳийда мен осмон булутларида келаётган инсон қиёфасидаги бир зотни^{*} кўрдим. У Азалий Нуронийнинг олдига келди. ¹⁴ Унга

хукмронлик, улуғворлик ва шоҳлик берилди. Барча халқлар, элатлар ва уруғлар унга бўйсунишди. Унинг ҳукмронлиги битмас–туганмас, абадий ҳукмронлиқдир. Унинг шоҳлиги ҳеч қачон бузилмайди.

Дониёр кўрган ваҳийнинг маъноси

¹⁵ Мен кўрган бу ваҳий юрагимга ғулғула солиб, алланечук ваҳимага туширган эди. ¹⁶ Мен тахт ёнида турганларнинг биттасига яқинлашиб, буларнинг ҳаммасини тушунтириб беришини сўрадим. У менга ваҳийнинг маъносини очиб, деди: ¹⁷ «Сен кўрган тўртта махлук бу ер юзида ҳукмронлик қиласидиган тўртта шоҳлиқдир. ¹⁸ Аммо Худойи Таолонинг азизлари шоҳликни қабул қилиб, унга то абад эга бўладилар.»

¹⁹ Мен тўртинчи махлук* ҳақида кўпроқ маълумот олишни хоҳлар эдим, чунки у бошқа махлуклардан ажralиб турар эди. Темир тишлари ва бронза чангallари бўлган бу бадбашара махлук қурбонларини ғажиб тилка–пора қилар, қолдиқларини босиб эзарди. ²⁰ Унинг бошидаги ўнта шохи, айниқса, янги ўсиб чиққан шох мени жуда қизиқтириб қолган эди. Ўша шох ўсиб чиқаётганда ўрнидаги учта шохни тушириб юборган эди. Кўзлари ва кибрланиб гапирадиган оғзи бўлган бу шох бошқа шохларга қараганда кўпроқ аҳамиятга эгадай бўлиб кўринар эди.

²¹ Бундан ташқари, ваҳийда мен ўша шохнинг Худонинг азиз халқи билан жанг қилаётганини ва уларни енгаётганини кўрган эдим. ²² Шу орада Азалий Нуроний келиб, Ўзининг азизлари фойдасига ҳукм чиқарди. Худойи Таолонинг азиз одамлари учун шоҳликни ўз тасарруфига олиш вақти етиб келган эди.

²³ Суҳбатдошим менга шундай деди: «Тўртинчи махлук бу ер юзида ҳукмронлик қиласидиган тўртинчи шоҳликнинг тимсолидир. Бу шоҳлик бошқа шоҳликлардан ажralиб туради. У бутун дунёни ғажиб, эзиз парча–парча қилади.

²⁴ Махлукнинг ўнта шохи — шоҳликни бошқарадиган ўнта ҳукмдордир. Кейинчалик тахтга янги бир ҳукмдор ўтиради. Бу ҳукмдор олдинги ўнта ҳукмдордан ажralиб туради ва учта ҳукмдорни тахтдан туширади. ²⁵ У куфр кетиб, Худойи Таолонинг азизларини аёвсиз эзади. Муқаддас байрамлар ва қонунларни ўзгартиришга уринади. Худонинг азиз одамлари уч яrim йил* давомида ўша ҳукмдорнинг зулми остида бўладилар. ²⁶ Бу муддат тугагач, самода суд мажлиси бошланади. Золим ҳукмдор тахтдан туширилиб, бутунлай йўқ қилинади. ²⁷ Худойи Таолонинг азизларига эса шоҳлик, ҳукмронлик ва ер юзидағи барча салтанатларнинг улуғворлиги берилади. Ҳамма ҳукмдорлар уларга бўйсуниб, хизмат қиласидилар, уларнинг шоҳлиги абадий шоҳлик бўлади.»

²⁸ Кўрган, эшитганларим мана шудир. Бу тушидан шу қадар ваҳимага тушган эдимки, рангимда ранг қолмаган эди. Аммо булар тўғрисида оғиз очмай, ҳаммасини ичимга ютдим.”

8-БОБ

Дониёрнинг кўчқор ва эчки ҳақидаги ваҳийси

¹ Дониёр шундай деб ёзди:

“Шоҳ Белшазар ҳукмронлигининг учинчи йилида* менга яна бир ваҳий келди.

² Бу ваҳийда мен Элам вилоятидаги Шушан қалъасида*, Улой дарёсининг бўйида турган эканман. ³ Мен дарё бўйида бир кўчқор турганини кўрдим. Унинг иккита узун–узун шоҳлари бор экан*. Иккинчи бўлиб чиққан шох биринчисига қараганда узунроқ экан*. ⁴ Кўчқор ўзини ғарб, шимол ва жанубга уриб, йўлида дуч келган

ҳамма нарсани сузар эди. Ҳеч қандай ҳайвон унга бас кела олмас, унинг қурбонларини қутқара олмас эди. Қўчқор хоҳлаган ишини қилар, кучи тобора ошиб борар эди.

⁵ Буни томоша қилиб турганимда, ғарб томондан бир така кўринди. Елдай учиб келаётган бу таканинг туёқлари гўё ерга тегмаётгандай туюлар эди. Унинг икки кўзи орасида улкан бир шох бор эди*. ⁶ У кутурганича қўчқор томон югурди-да, ⁷ қаҳр-ғазаб билан унга ташланиб, сузди. Таканинг зарбаси зўрлигидан, қўчқорнинг иккала шохи синиб тушди. Қўчқор такага бас кела олмади. Така уни ерга йиқитиб топтади, ҳеч ким қўчқорни ундан қутқара олмас эди.

⁸ Така ниҳоятда кучайиб кетди, аммо куч-қудрат чўққисида унинг улкан шохи синиб тушди. Синиб тушган шохнинг ўрнига дунёнинг тўрт томонига қайрилган тўртта шох ўсиб чиқди*.

⁹ Уларнинг биридан яна битта шохча чиқди. Унинг куч-қудрати ошиб, жануб, шарқ ва гўзал Истроил ўлкаси* томон ёйилди. ¹⁰ Қудрати осмону фалакка етган бу шох самовий лашкарларга хужум қилди. Самовий лашкарлар бўлмиш юлдузларнинг айримларини ерга тушириб топтади. ¹¹ Ҳатто самовий лашкарнинг Саркардаси — Худони менсимай, Унга келтириладиган қундалик қурбонликларни тўхтатди. Маъбадни эса вайрон қилиб, ¹² самовий лашкарларни мағлуб қилди. Қундалик қурбонликлар ўрнига ҳаддан ташқари жирканч бир нарсани ўрнатди. Ҳақиқатни оёқ ости қилган бу шох ҳар бир ишида муваффақият қозонар эди*.

¹³ Кейин мен фаришталар ўзаро гаплашаётганини эшишиб қолдим. Уларнинг бири бошқасидан шундай деб сўраганини эшиздим:

— Ваҳийдаги бу ҳодисалар қачонгача давом этар экан-а? Қачонгача бу жирканч нарса қундалик қурбонликлар ўрнини эгаллайди? Қачонгача Маъбад ва самовий лашкарлар оёқ ости бўлади?

¹⁴ Шериги унга шундай жавоб берди:

— Бундай аҳвол 2300 кечаю қундуз* давом этади. Ўша вақт мобайнида қурбонликлар келтирилмайди. Шундан сўнг Маъбад покланиб, асл ҳолига қайтарилади.

Фаришта Жаброил ваҳийларни тушунтириб беради

¹⁵ Мен кўрган ваҳийнинг мағзини чақмоқчи бўлиб, бошимни қотириб турганимда, бирданига олдимда одам қиёфасидаги аллаким пайдо бўлди. ¹⁶ Шу пайтда мен Улой дарёси томонидан:

— Эй Жаброил, бу одамга ваҳийнинг маъносини тушунтириб бер, — деб хитоб қилаётган инсон овозини эшиздим. ¹⁷ Жаброил менга яқинлашганда, мен қўрққанимдан юз тубан ерга йиқилдим. Аммо у менга:

— Тушунгин, эй инсон*, бу охирзамон ваҳийси, — деди.

¹⁸ У гапираётганда мен ҳушимдан кетиб, юз тубан ерда чўзилиб ётган эдим. Аммо у қўлини теккизиб, мени турғизиб қўйди-да, ¹⁹ шундай деди:

— Эшият, мен сенга охирзамон пайтида содир бўладиган нарсаларни аён қиласман, ўша даврда Худо Ўз ғазабини ер юзига сочишни белгилагандир. ²⁰ Сен кўрган икки шохли қўчқор — бу Мидия ва Форс шоҳликлариdir. ²¹ Така эса Юон шоҳлигидир. Иккала кўзининг орасидаги улкан шох — бу Юон шоҳлигининг таҳтида ўтирадиган биринчи ҳукмдордир. ²² Синиб тушган шохнинг ўрнига чиқсан тўртта шох — Юон шоҳлиги тўрт қисмга бўлинишини билдиради. Тахтга ўтирган тўртала ҳукмдор олдинги ҳукмдорга қараганда заифроқ бўлади.

²³ Уларнинг ҳукмронлик пайтлари охирлаб, гуноҳлари тўлиб-тошганда,

мақр-хийлага уста, важоҳати хунук бир ҳукмдор тахтга ўтиради.²⁴ У ниҳоятда кучайиб кетади, бироқ ўзининг кучи билан эмас. У ҳамма ёқни вайрон қилиб, барча ишларида муваффақият қозонади. Забардаст йўлбошчилару Худонинг азизларини қириб ташлайди.²⁵ Усталик билан ишлатган маккорлиги туфайли кўп ютуқларга эришади. Кўзини ёғ босган бу ҳукмдор огоҳлантирмасдан кўп одамларни ҳалок қиласди. У ҳатто энг буюк Ҳукмдорга қарши бош қўтаради. Оқибатда эса йўқ қилиб ташланади, аммо бу инсоннинг кучи билан қилинмайди.²⁶ Дониёр, мен ҳозир сенга тушунтириб берган эрталабки ва кечқурунги қурбонликларга оид бўлган бу ваҳий албатта амалга ошади. Сен ваҳийни сир тутгин, чунки бу узоқ келажакка оид нарсадир.

²⁷ Бу воқеадан сўнг тобим қочиб, бир неча кун бетоб бўлиб ётдим. Кейин туриб, шоҳнинг хизматига қайтдим. Аммо ваҳий мени тамомила эсанкиратиб қўйган эди. Мен унинг маъносини тушуммаган эдим.

9-БОБ

Дониёр ҳалқ учун ибодат қиласди

¹ Бобил^{*} тахтига ўтирган Мидиялик Ахашвераш^{*} ўғли Доро^{*} ҳукмронлигининг илк даври. ² Мен Доро ҳукмронлигининг дастлабки йилида пайғамбарлар ёзиб қолдирган битикларни мутолаа қилишга киришган эдим. Эгамиз Еремиё пайғамбарга айтган сўзларига кўра*, Куддус етмиш йил давомида хароб бўлиб ётишини билиб олдим.

³ Шунда мен Раббий Худога ёлвордим, рўза тутиб, қанорга ўрандим, кулга беланиб^{*,} илтижо қилдим. ⁴ Мен Эгам Худога ибодат қилиб, ҳалқимнинг гуноҳлари учун шундай деб тавба қилдим:

Ё Раббий, Сен буюк ва ҳайбатли Худосан! Сени севиб, амрларингга риоя қилган бандаларингга Сен аҳдингни содиқ сақлайсан. ⁵ Аммо биз ноҳақлик қилиб, гуноҳга кўл урдик. Қабиҳ ишлар қилиб, Сенга қарши бош қўтардик, амрлару қонун-қоидаларингни унугиб,⁶ шоҳларимизга, раҳнамоларимизга, ота-боболаримизга ва авом ҳалққа Сенинг номингдан гапирган хизматкорларинг — пайғамбарларга биз қулоқ солмадик.

⁷ Сен ҳақсан, ё Раббий. Биз эса бугун шарманда бўлдик. Биз Сенга хиёнат қилганимиз учун, Сен ҳаммамизни — Яхудо ва Қуддус аҳолисини ҳамда бутун Исроил ҳалқини яқин ва узоқ юртларга тарқатиб юборгансан. ⁸ Эй Эгам, биз Сенга қарши гуноҳ қилганимиз учун шоҳларимиз, раҳнамоларимиз, ота-боболаримиз — биз ҳаммамиз шарманда бўлдик. ⁹ Ё Раббимиз Худо, биз Сенга қарши бош қўтарган бўлсак ҳам, Сен гуноҳларимизни кечиравчи, раҳмдил Худосан. ¹⁰ Эй Эгамиз Худо, биз Сенга итоат этмадик! Сен хизматкорларинг бўлмиш пайғамбарлар орқали бизга қонунлар бердинг, аммо биз уларга риоя қилмадик.

¹¹ Бутун Исроил ҳалқи қонунингни бузиб, ҳақ йўлдан озди, Сенга қулоқ солишни хоҳламади. Биз Сенга қарши гуноҳ қилганимиз учун қулинг Мусонинг қонунида ёзилган қасамёду лаънатлар бошимизга тушди. ¹² Ҳа, Сен бизни ва раҳнамоларимизни огоҳлантирган эдинг! Сўнг айтганларингни қилиб, бошимизга шундай фалокатлар ёғдирдингки, Куддусда юз берган бундай даҳшатли фожиани ёруғ дунё ҳали кўрмаган эди. ¹³ Мусонинг қонунида ёзилган ҳар бир фалокат бошимизга тушди. Аммо биз шунда ҳам гуноҳларимиздан қайтмадик, Эгамиз Худонинг

марҳаматини изламадик, Унинг содиқлигини эсга олмадик.¹⁴ Вақти келиб Эгам бизни бу фалокатларга гирифтор қилди, чунки биз Унинг гапларига итоат қилмадик. Дарҳақиқат, Эгамиз Худо доим адолат ила иш тутар.

¹⁵ Эй Раббимиз Худо, Сен Ўз халқингни құдратинг ила Мисрдан олиб чиқиб, шұхратингни оламга ёйдинг. Сенинг құдратинг бугунға қадар тилга олинар. Биз эса гуноҳ қилдик, қабиҳликка қўл урдик.¹⁶ Ё Раббий, Сен ўтмишда бизга кўп илтифот қилдинг. Ҳозир ҳам ғазабу қаҳрингни Қуддусдан йироқ қилгин, деб ёлвораман. Қуддус Сенинг шаҳринг, Сенинг муқаддас тоғинг-ку*, ахир! Бизнинг ва ота-боболаримизнинг гуноҳлари туфайли Қуддус ва танланган халқинг қўшни халқлар орасида хор-зор бўлмоқда.¹⁷ Шунинг учун, эй Худойимиз, мен, қулингнинг ибодату илтижоларига қулоқ тутгин. Ё Раббий, хароб бўлган Маъбадингга Ўз ҳақи-хурматинг учун мунаввар юзинг билан боққин.¹⁸ Эй Худойим, қулоқ солиб, нолаларимизни эшитгин! Кўзингни очиб, биз тортган жабрни кўриб қўйгин! Шаҳарнинг аҳволига бир қара, ахир, у Сенинг номинг билан аталган-ку! Биз Сенинг марҳаматингга лойик бўлмасак-да, Ўзингнинг чексиз раҳмдиллигинг туфайли бизга шафқат қил.¹⁹ Ё Раббий, нолаларимни эшитгин! Ё Раббий, бизни кечиргин! Ё Раббий, илтижоларимни эшитиб ёрдам бергин! Хурматинг ҳақи шошилгин, чунки бу шаҳринг ва халқинг Сенинг номинг билан аталгандир, эй Худойим!

Жаброил башоратни тушунтириб беради

²⁰ Мен тоат-ибодатда бўлиб, ўзимнинг гуноҳларим ва халқим Истроилнинг гуноҳлари учун тавба қилиб, Худонинг муқаддас тоғи — Қуддус* учун Эгам Худога илтижо қилаётган эдим.²¹ Кечки қурбонлик пайтида мен ҳали ибодат қилаётганимда, олдимга Жаброил учеб тушди. Мен уни олдинги ваҳийда ҳам кўрган эдим*.²² У менга тушунтириди: «Дониёр, мен олдингга ваҳийни тушунтиromoқ учун келдим.²³ Сен Худога илтижо қила бошлаганингда, У сенга жавоб берган эди. Мен жавобини сенга етказмоқ учун келдим, чунки сен Худонинг суюкли бандасисан. Қани, энди айтадиган гапларимни яхшилаб эшит, ваҳийнинг маъносини тушуниб олгин:²⁴ исённи бартараф этиш, қабиҳликка чек қўйиш, гуноҳдан поклаш ҳамда абадий адолат ўрнатиш учун Худо сенинг халқинг ва муқаддас шаҳринг учун етмиш карра етти йил* белгилади. Шунда ваҳий ва кароматлар амалга ошади, муқаддас Маъбад* эса табаррук қилинади.²⁵ Шуни билиб қўйгинки, Қуддусни тиклаш учун амр берилганидан то Худо мой суртиб танлаган йўлбошли* келгунига қадар, етти карра етти йил* ўтади. Олтмиш икки карра етти йил* мобайнида Қуддус шаҳри, унинг йўллари ва мудофаа иншоотлари тикланади, аммо булар мashaқатли дамларда содир бўлади.²⁶ Олтмиш икки карра етти йил ўтгач, Худо танлаган йўлбошли ўлдирилади. У эришган ҳамма нарса барбод бўлади*. Кўшин тортиб келган ажнабий бир ҳукмдор шаҳарга кучли селдай ёпирилиб, шаҳарни ҳамда Маъбадни вайрон қиласиди. Худонинг қарорига мувофиқ, урушу вайронагарчиликлар ўша даврнинг охиригача давом этади.²⁷ Ўша ҳукмдор кўп халқлар билан бир карра етти йилга* кучли бир битим тузади. Ўша вақтнинг ярми ўтгач, қурбонлик ва назрларга чек қўйиб, Маъбадда* макруҳ бир нарса ўрнатади. Бу нарса кўп ҳаром-хариш ишларга сабаб бўлади*. Бу аҳвол Худо белгилаган кунгача давом этади. Ўша куни шаҳар билан Маъбадни вайрон қилган ҳукмдорнинг куни битади.»”

10-БОБ

Дониёрнинг фаришта ҳақидаги ваҳийси

¹ Форс шоҳи Куруш хукмронлигининг учинчи йилида*, Белташазар деб аталган Дониёрга* Худодан бир хабар келган эди. Келажакда албатта содир бўладиган кучли тўқнашувга оид бўлган бу* хабарнинг маъноси Дониёрга ваҳий орқали аён бўлди. ² Дониёр шундай деб ёзди:

“Ўша пайтда мен уч ҳафта азадордай юрдим. ³ Уч ҳафта давомида ҳеч қандай тансиқ таом емадим, гўшт билан шаробни оғзимга олмадим, ювиниб-таранмадим. ⁴ Биринчи ойнинг* йигирма тўртинчи кунида буюк Дажла дарёсининг бўйида турганимда, ⁵ мен бирорни кўрдим. Унинг эгнида зифир толасидан тўқилган либос, белида соф тилладан ясалган камар* бор эди. ⁶ Унинг танаси қимматбаҳо тошдай ярқираб турагар эди. Юзи яшиндай порлаб, кўзлари машъаладай ёниб турагар эди. Оёқ-қўллари ялтироқ мисдай товланиб, овози бутун бир оломон овозидай янграр эди.

⁷ Ваҳийни фақат мен кўрдим. Ёнимдагилар ваҳийни кўрмаган бўлсалар ҳам, ваҳимага тушдилар. Улар тумтарақай бўлиб ҳар ёққа яшириниб олдилар. ⁸ Мен бир ўзим қолдим. Ўша ажойиб ваҳийни қўраётганимда қувватсизланиб, афт-ангорм таниб бўлмайдиган даражада ўзгариб кетганини сездим. Мадорим қолмаган эди. ⁹ Мен фариштанинг овозини эшитганимда хушимдан кетиб, юз тубан ерда чўзилиб қолдим. ¹⁰ Сўнг эса кимнингдир бир қўли менга тегиб, мени кафт ва тиззаларимга турғизиб қўйди.

¹¹ Ўша фаришта менга:

— Эй Дониёр, сен Худонинг суюкли бандасисан, — деди. — Қани, тур! Сенга айтадиган гапларимга қулоқ сол, чунки мен сенинг олдингга юборилганман.

У шу гапларини менга айтаётганда, мен қалтираб ўрнимдан турдим.

¹² — Дониёр, қўрқма! — деди у менга. — Сен ҳаёт лаззатларидан воз кечиб, хабар хусусида мулоҳаза юритишни бошлаган кунингдаёқ, илтижоларинг ижобат бўлган эди. Илтижоларингга биноан, мен олдингга келдим. ¹³ Аммо Форс шоҳлигини ҳимоя қилувчи фаришта йигирма бир кун давомида менга қаршилик кўрсатди. Мен у билан жанг қилиб ҳаяллаб қолганим учун*, бош фаришталардан бири бўлган Микойил менга ёрдамга келди. ¹⁴ Мен сенга келажакда халқинг бошига тушадиган нарсаларни тушунтириш учун келдим. Бу ваҳий ўша кунларга оиддир.

¹⁵ У шу сўзларни гапираётганда, мен лом-мим дея олмай, бошимни эгиб турагар эдим. ¹⁶ Сўнг одам қиёфасидаги бошқа бирорни лабларимга қўл теккизди. Мен оғзимни жуфтлаб, олдимда турганга дедим:

— Ҳазратим, бу ваҳий юрак-бағримни эзиб юборди, мадорим қуриди.

¹⁷ Мендай бир қул қандай қилиб ҳазратим билан гаплаша олади? Ҳолдан тойганман, базўр нафас оляпман.

¹⁸ У яна бир бор менга қўлинини теккизиб, менга куч ато этди. ¹⁹ Мен биринчи кўрган бошқа бирорни* шундай деди:

— Эй Худонинг суюкли бандаси, қўрқма! Тинчлан! Дадил бўл!

У менга гапираётганда, дадилланиб дедим:

— Ҳазратим, сиз менга далда бердингиз, энди гапираверинг.

²⁰⁻²¹ — Сенинг олдингга нима учун келганимни биласанми ўзи? — деб сўради у. — Мен сенга Ҳақиқат китобида ёзилган нарсаларни айтиб бермоқчиман. Бундан сўнг мен қайтиб, Форс шоҳлигини ҳимоя қилувчи фариштага қарши

урушга чиқаман. Кейин Юнон шоҳлигини ҳимоя қилувчи фаришта билан жанг қиласан. Бу тўқнашувда Истроилни ҳимоя қилувчи Микойил фариштадан бошқа ёрдамчим йўқ.

11-БОБ

¹ Мидиялик Доро* хукмронлигининг биринчи йилида мен Микойилга ёрдам бераб, уни муҳофаза қилиб турган эдим.”

Фаришта Дониёрга берган башорат

Миср ва Сурия шоҳликлари

² Фаришта* гапида давом этиб, Дониёрга шундай деди:

“Энди эса мен сенга ҳақиқатни айтаман. Форс шоҳлигига яна учта шоҳ ҳукмронлик қиласди. Тўртинчи шоҳ бошқаларга қараганда анча бадавлат бўлади. У бойлиги орқали куч орттириб, ҳаммани Юнон шоҳлигига қарши қўзғатади.

³ Кейин таҳтга жанговар бир шоҳ ўтиради, у бекиёс бир салтанатни бошқариб, хоҳлаган ишини қиласди. ⁴ Аммо қудратининг чўққисида салтанати парчаланиб, тўрт қисмга бўлинниб кетади. Шоҳ сулоласига мансуб бўлмаган етти ёт бегоналар таҳтга ўтиради, бироқ салтанатнинг илгариги куч-қудрати уларда бўлмайди.

⁵ Шу орада Миср шоҳи* кучайиб кетади, аммо шоҳнинг зобитларидан бири зўрайиб, шоҳ салтанатидан улканроқ бир салтанатга ҳукмронлик қиласди. ⁶ Бир неча йил ўтгач, Миср шоҳи Сурия шоҳи* билан иттифоқ тузиб, унга қизини узатади. Шу орқали у Сурия шоҳи билан алоқасини мустаҳкамламоқчи бўлади, бироқ иттифоқ узоқ давом этмайди. Қиз, қуёв, қизнинг отаси* ва уларнинг хизматкорлари хоинликнинг қурбонлари бўлишади.

⁷ Кўп ўтмай Миср таҳтига қизнинг қариндошларидан бири ўтиради. У Сурия шоҳининг қўшинларига ҳужум қилиб, истеҳкомларини забт этади. Қўшинларни тор-мор қилиб, ғалаба қозонади. ⁸ Сурия худоларининг ҳайкалларини, олтин ва кумушдан қилинган қимматбаҳо идишларни ўлжа қилиб, Мисрга олиб кетади. Сўнг бир неча йил давомида Сурия шоҳининг тинчлигини бузмайди. ⁹ Шундан кейин Сурия шоҳи Мисрга бостириб боради, аммо енгилиб, ўз юртига қайтиб кетади.

¹⁰ Сурия шоҳининг ўғиллари жангга отланиб, Мисрга катта бир қўшин тортиб боришади. Қўшинлар сел каби оқиб, ёвнинг қалъасига ҳужум қилишади.

¹¹ Газабланган Миср шоҳи Сурия шоҳи билан жанг қилиб, катта ёв қўшинини тор-мор қиласди. ¹² Ғалабага эришган Миср шоҳи ўта мағурланиб кетади, аммо омад унга бошқа кулиб боқмайди, ¹³ чунки бир неча йилдан кейин Сурия шоҳи яна Мисрга қўшин тортиб келади. Бу сафар Сурия қўшинлари олдингидан ҳам зиёдроқ, тиш-тироғигача қуролланган бўлади.

¹⁴ Шунда кўп одамлар Миср шоҳига қарши бош кўтарадилар. Ваҳий амалга ошсин деб, халқинг орасидаги айрим зўравонлар ҳам қўзғалади, аммо муваффақиятга эриша олмайдилар. ¹⁵ Сурия шоҳи мустаҳкам бир шаҳарни қамал қилиб, қўлга киритади. Сурияning сиқуви остида Миср қўшинлари чекинадилар, ҳатто Мисрнинг сараланган лашқари ҳам ёв қўшинининг шиддатли ҳужумини қайтара олмайди. ¹⁶ Сурия шоҳи хоҳлаган ишини қиласди, бирор киши унга қаршилик қилишга журъят этмайди. У гўзал Истроил юртини* қўлга киритиб, уни вайрон қилиш имкониятига эга бўлади.

¹⁷ Даставвал Сурия шоҳи ўз салтанатидаги бор қўшинни тўплаб, Мисрни забт этмоқчи бўлади. Кейин Мисрни ичидан емирмоқчи бўлиб, Миср шоҳи билан сулҳ

тузади ва унга қиз узатади. Аммо Сурия шоҳининг бу режалари пучга чиқиб, муваффақият келтирмайди.¹⁸ Бундан сўнг Сурия шоҳи денгиз қирғоғидаги шаҳарларга хужум қилиб, кўпларини қўлга киритади. Аммо ўзга юртлик бир саркарда бу сурбет шоҳнинг попугини пасайтириб, қилмишларига яраша жазосини беради.¹⁹ Шунда Сурия шоҳи чекиниб, ўз юртидаги қалъаларига қайтиб кетади, аммо йўлда ҳалокатга учраб нобуд бўлади.

²⁰ Унинг ўрнига Сурия тахтига бошқа бир шоҳ ўтиради. Хазинасини бойитмоқчи бўлган бу шоҳ зобитини юбориб, одамларга катта солиқлар солади. Аммо қисқа вақт ичida ҳалок бўлади. Бу нохуш воқеа на жангда, на бирорвнинг қасди натижасида содир бўлади.

Разил Сурия шоҳи

²¹ Тахтга ўтирган кейинги шоҳ эса ярамас бир одам бўлади. Шоҳ сулоласига мансуб бўлмаган бу киши кутилмагандан ҳийла орқали Сурия тахтига чиқиб олади.²² Унга қаршилик кўрсатган барча қўшинларни орадан супуриб ташлаб, йўқ қиласи. Ҳатто олий руҳонийни* ҳам шу кўйга солади.²³ У бошқа халқлар билан битим тузгач, маккорона иш тутади. Унга эргашувчиларнинг сони кам бўлишига қарамай, қудрати тобора ошиб бораверади.²⁴ У тўсатдан бадавлат вилоятларга бостириб бориб, ота-боболари қилмаган ишларга қўл уради. Қўлга киритган ўлжаю мол-мулкни ўзига эргашганларга улашиб беради. Қалъаларни қўлга олиш режаларини тузади, аммо бундай ҳол узоқ давом этмайди.

²⁵ У куч-қудратини йиғиб, Миср шоҳига қарши катта бир лашкар тортиб боради. Миср шоҳи эса Сурия лашкаридан бисёроқ ва кучлироқ қўшин билан ёв хужумини қайтармоқчи бўлади. Бироқ ҳийлагарларнинг домига тушиб, инқирозга юз тутади.²⁶ Миср шоҳининг ўз ҳамтовоқлари унинг томирига болта урадилар. Тор-мор бўлган Миср қўшинлари жангда ҳалок бўладилар.²⁷ Ўша иккала шоҳ бир дастурхонда ўтириб овқатланишади, аммо дилидаги ғаразни хушомад билан яшириб, бир-бирига ёлғон гапиришади. Бироқ Худо белгилаб қўйган вақт-соати етиб келмагани учун, биронтаси ҳам муваффақиятга эришмайди.²⁸ Сурия шоҳи бир талай бойлик билан она юртига қайтиб кетади. Йўлда эса муқаддас аҳд аҳлига ва уларнинг эътиқодига қарши чиқиб, уларга кўп озор етказади.

²⁹ Белгиланган вақтда Сурия шоҳи яна Мисрга юриш қиласи, аммо бу сафар вазият бошқача тус олади.³⁰ Фарб соҳилларидан* келган жанг кемалари Сурия шоҳига қаршилик кўрсатишади, юраги дов бермаган Сурия шоҳи чекинади. Бироқ муқаддас аҳд аҳлига ва уларнинг эътиқодига ғазабини сочиб, аламидан чиқади, муқаддас аҳддан тойғанларни эса мукофотлайди.³¹ Унинг лашкари Худо ҳалқининг қалъаси бўлмиш Маъбадга бостириб кириб, табаррук жойни ҳаром қиласи. Улар кундалик қурбонликларни тўхтатиб, кўп ҳаром-хариш ишларга сабаб бўладиган макруҳ нарсани* ўрнатишади.³² Шоҳ ширин сўзлар билан аҳддан тойғанларнинг кўнглини овлаб, уларни ўз томонига оғдириб олади. Худога содик қолганлар эса бор кучлари билан унга қаршилик кўрсатадилар.³³ Ҳалқ орасидаги доно йўлбошчилар одамларга оқилона панд-насиҳатлар беришади. Аммо кўп ўтмай уларнинг айримлари қиличдан ўтказилади, айримлари тириклиайн оловда куйдирилади, айримлари зинданга ташланади, уларнинг мол-мулки тортиб олинади.³⁴ Қувғин пайтида уларга озгина ёрдам тегади. Бироқ сафларига баъзи бир риёкор одамлар кириб олишади.³⁵ Қувғин пайтида айрим доно кишилар азоб чекадилар. Бироқ бу азоблар орқали Худо уларни охирзамон вақтига тайёрлаб, тозалаб поклайди, чунки белгиланган вақт ҳали ҳам келмаган бўлади.

³⁶ Сурия шоҳи хоҳлаганини қиласи. Ўзини юксалтириб, худолардан устун

қўяди. Энг буюк Худога қарши гапириб, куфр кетади. Худо белгилаб қўйган ғазаб даври тугагунига қадар муваффақият қозонади. Бироқ Худо йўз режасини албатта амалга оширади.³⁷ Сурия шоҳи ота-боболари сифинган худоларни ҳамда аёллар яхши қўрадиган худони* писанд қилмайди. Ўзини юксалтириб, биронта худони назарига илмайди.³⁸ Буларнинг ўрнига у қалъаларни ҳимоя қилувчи худони* улуғладиди. Ота-боболари топинмаган бу худога у олтин, кумуш, жавоҳир ва қимматбаҳо совғаларни назр қилади.³⁹ Ўзга юрт худосининг ҳомийлиги билан қалъаларини ҳимоя қилади. Уни ҳақиқий ҳукмдор деб билганларга иззат-эҳтиром билдириб, юқори мансабларга кўтаради. Бундай одамларга ерларни мукофот сифатида бўлиб беради.

⁴⁰ Охирзамон вақтида Миср шоҳи Сурия шоҳига хужум қилади. Аммо Сурия шоҳи жанг аравалари, чавандозлари ва талай кемалари билан унга қаршилик кўрсатиб, тошқин сувлар каби кўп шоҳликларни босиб олади.⁴¹ У гўзал Истроил ўлкасини ҳам зabit этиб, минглаб халқларнинг бошига етади. Аммо Эдом ҳамда Мўаб халқлари ва Оммон* халқининг асосий қисми Сурия шоҳининг чангалидан қочиб қутулади.⁴² Кўплаб шоҳликлар, шулар қатори, Миср ҳам Сурия истилоси остида қолади.⁴³ Сурия шоҳи Мисрнинг олтину кумуш хазиналарига ва барча бойликларига эгалик қилади. Ливияликлар билан Ҳабашистонликлар* ҳам унга қарам бўладилар.⁴⁴ Бироқ шарқ ва шимолдан келган нохуш хабарлар Сурия шоҳини ваҳимага солади. Бу хабарлардан дарғазаб бўлган шоҳ йўлга отланиб, кўп одамларни қириб ташлади.⁴⁵ Сўнг денгиз ва гўзал муқаддас тоғ орасидаги ерларга бориб, у ерда шоҳона чодирларини тикади. Аммо ўша жойда жон беради, унга ёрдам берадиган ҳеч ким бўлмайди.”

12-БОБ

Охирзамон

¹ Фаришта* гапини давом эттириди:

“Ўша пайтда халқингни ҳимоя қилувчи буюк Микойил фаришта ҳозир бўлади. Шунда инсонлар бирлашиб халқ бўлгандан бери мисли кўрилмаган даҳшатли азоб-уқубатлар даври бошланади. Аммо ўша дамларда сенинг халқинг орасидан Худонинг китобига* исми ёзилган ҳар бир одам нажот топади.² Қора ер бағрида ётганларнинг кўпчилиги уйғонади: кимдир абадий ҳаётга эришади, кимдир шармандалигу абадий иснодга дучор бўлади.³ Донолар мусафро осмон каби яшнайдилар, одамларни ҳақ йўлга солганлар эса юлдузлар каби мангу порлайверадилар.⁴ Сен эса, эй Дониёр, китобни муҳрлагин-у, бу сўзларни охирзамонгача сир сақла. Бу давр мобайнида кўп одамлар ўзларини у ёқдан-бу ёққа уриб, юз бераётган ҳодисаларни тушунмоқчи бўладилар*.”

Дониёрнинг икки фаришта ҳақидағи ваҳийси

⁵ Дониёр шундай деб ёзди:

“Мен дарёning бўйида пайдо бўлган яна бошқа икки фариштани кўрдим. Биттаси дарёning бу томонида, бошқаси у томонида тураг эди.⁶ Уларнинг бири оқимнинг юқори қисмида турган зиғир либосли фариштадан*:

— Бундай қийинчиликлар қачонгача давом этади? Охири борми ўзи? — деб сўради.

⁷ Зиғир либосли фаришта иккала қўлини осмонга чўзиб, барҳаёт Худонинг номи билан қасам ичганини ва шундай сўзлар айтганини эшигдим:

— Бу қийинчиликлар уч ярим йил* давом этади. Худога қарашли одамларнинг куч-қудрати тамомила йўқ қилингандан кейин, ўша қувғинларнинг барчаси ўз ниҳоясига этади.

⁸Ўша одамнинг гапларини эшитдим-у, тушунмадим:

— Эй ҳазратим, бунинг оқибати нима бўлади? — деб сўрадим.

⁹У шундай жавоб берди:

— Бу тўғрида ҳеч хавотир олма, Дониёр, чунки бу сўзлар муҳрланган бўлиб охирзамонга қадар сир сақланади. ¹⁰Бу қувғинлар туфайли кўп одамлар тозаланиб, покланади, аммо фосиқлар фосиқлигини давом эттираверади. Фосиқларнинг биронтаси ҳам буни тушунмайди, донолар эса буларнинг барчасини англаб оладилар. ¹¹Кундалик қурбонликлар тўхтатилиб, кўп ҳаром-хариш ишларга сабаб бўладиган макруҳ бир нарса* ўрнатилган пайтдан бошлаб 1290 кун ўтади. ¹²Охиргача, яъни 1335 кун ўтгунга қадар содик бўлиб қолганлар нақадар баҳтиёрдир. ¹³Эй Дониёр, сен эса ҳаётингни шу зайлда давом эттиравер. Вақти келиб, оламдан кўз юмасан. Охиратда эса мукофотингни олиш учун тириласан.”

ИЗОҲЛАР

1:1 Яҳудо — Яҳудо қабиласи Исроилнинг жанубий қисмидаги энг катта қабила эди. Шоҳ Сулаймон вафотидан кейин шимолдаги ўнта қабила жанубдаги Яҳудо ва Бенямин қабилаларидан ажралиб чиқди (3 Шоҳлар 11:26-12:24 га қаранг). Яҳудо ва Бенямин қабилалари жанубий шоҳлик деб аталадиган бўлди. Жанубий шоҳликнинг пойтахти Қуддус бўлиб қолаверди, уларнинг ўз ҳукмдорлари бор эди. Тўлиқроқ маълумотга эга бўлиш учун луғатдаги ЯҲУДО сўзига қаранг.

1:1 Яҳудо шоҳи Ёҳайиқим ҳукмронлигининг учинчи йили — милоддан олдинги 605 йил.

1:2 Раббий Ёҳайиқимни Навуҳадназарнинг қўлига берди — Ёҳайиқим уч йил давомида Навуҳадназарга қарам бўлди. Охири, у Навуҳадназарга қарши исён кўтарди. Ёҳайиқим Қуддусда вафот этган бўлиши мумкин (4 Шоҳлар 24:1-6 га қаранг). Шундан кейин унинг ўғли Ёҳайихин Яҳудо тахтига ўтирди. Навуҳадназар уни милоддан олдинги 597 йилда Бобилга асир қилиб олиб кетди (4 Шоҳлар 24:8-15 га қаранг).

1:2 Бобил — ибронийча матнда *Шинар*, Месопотамиядаги, яъни Дажла ва Фурот дарёлари орасида жойлашган ерлардаги бир худуднинг қадимги номи. Бобил шоҳлиги дастлаб шу ерда барпо бўлиб, кейинчалик кўп ерларни эгаллаган буюк шоҳлик бўлган.

1:3 мулозим — қадимда сарой хизматида бўлган киши (шу бобнинг 7, 8, 9, 10, 11, 18-оятларида ҳам бор). Мулозим ҳукмдорнинг ёки саройдаги юқори лавозимдаги амалдорнинг фармонларини, топшириқларини бажарган ва уларнинг номидан иш юритиш ҳуқуқига эга бўлган. Бу ўриндаги ибронийча сўз бичилган эркакка нисбатан ҳам ишлатилган. Ҳукмдорнинг хонадонидаги аёллар билан кўп мuloқot қилиш зарурати бўлгани учун бу мулозимлар кўпинча бичиб қўйилар эди.

1:4 бобил тили — ибронийча матнда *халдей тили*, ўша вақтда Бобил юрти *Халдейлар юрти* деб ҳам аталарди.

1:8 Дониёр шоҳона егулик ва шаробдан булғанишини хоҳламади... — қадимги пайтларда одамлар ўз худоларига қурбонлик қилинган ҳайвоннинг гўштини тановул қилишарди, шароб ҳам мана шу қурбонликка қўшиб назр қилинарди. Эҳтимол, шоҳ дастурхонидаги батъзи бир егуликлар, Мусо қонунига кўра, ҳаром ҳисоблангандир (Левилар 11:1-47 га қаранг). Мана шу сабабларга кўра, Дониёр шоҳона егуликларни рад этган.

1:10 сизлар — яъни Дониёр ва унинг дўстлари Шадрах, Мешах ва Абеднаху. Дониёрнинг дўстлари ҳам, Дониёр билан бир қаторда, шоҳона егулиқдан воз кечганлари кўриниб турибди.

1:21 шоҳ Куруш ҳукмронлигининг биринчи йили — милоддан олдинги 538 йил. Мидия ва Форс лашкарлари шоҳ Куруш бошчилигига Бобил шаҳрини милоддан олдинги 539 йилда босиб олган эдилар. Шоҳ Куруш милоддан олдинги 530 йилгача Бобилда ҳукмронлик қилди. У Кир исми билан ҳам танилган.

2:1 Навуҳадназар ўз ҳукмронлигининг иккинчи йили — милоддан олдинги 603 йил.

2:2 афсунгарлар — ибронийча матнда *Халдейлар*, ўша вақтда Бобилликлар шу ном билан ҳам аталарди (шу бобнинг 10-оятида ҳам бор). Халдейлар фолбинлик ва сеҳр-жоду қилишлари билан ном таратганлари учун, мана шундай иш билан шуғулланадиган одамларга нисбатан ҳам мана шу термин ишлатилган.

2:4 ...орамий тилида дедилар... — мана шу жойдан 7-бобнинг охиригача асл матн иброний тилида эмас, орамий тилида ёзилган.

2:15 шошилинч — ёки шафқатсиз.

2:26 ...Дониёрнинг бошқа исми Белташазар эди... — 1:7 га қаранг.

2:27 раммол — фолбинларнинг бир тури. Қадимги шарқда, хусусан, Бобилда

раммоллар алоҳида илмий лаёқатга эга бўлган шахслар деб қаралар эди.

Уларнинг башоратлари астрология илмига — осмон ёритқичларининг ҳолатига асосланар эди.

2:34 ўз-ўзидан — орамийча матнда инсон қўли билан эмас. Бу ишни Худо қилгани назарда тутилган (шу бобнинг 45-оятида ҳам бор).

2:36-45 Навуҳадназарнинг тушидаги ҳайкал бирин-кетин ҳукмронлик қиласиган тўртта шоҳликка ишора қиласиди. Худо бу тўрттала шоҳликни вайрон қилиб, уларнинг ўрнига Ўзининг янги Шоҳлигини барпо қиласиди. Худонинг Шоҳлиги бутун ер юзига ёйилиб, абадий туроди (шу бобнинг 35, 44-оятларига қаранг). Кўп олимлар ҳайкалнинг тўрт қисмини қуидагича шарҳлашади: тилла бош — Бобил шоҳлиги (шу бобнинг 38-оятига қаранг), ҳайкалнинг кумуш кўкраги ва қўллари — бирлашган Мидия ва Форс шоҳлиги. Бу шоҳликка Куруш милоддан олдинги 539 йилда, Бобил қулагандан кейин асос солган (1:21 изоҳига қаранг).

Ҳайкалнинг бронза бели ва сонлари — милоддан олдинги 330 йилларда Искандар Зулқарнайн асос солган Юнон империясини билдиради. Темир болдиrlар — Рим империясидир. Бир қисми лойдан, бир қисми темирдан бўлган оёқлар ва оёқ бармоқлари — олдин Римликларнинг қўли остида бўлган худуддаги шоҳликларнинг конфедерациясини билдиради. Бошқа олимларнинг талқинларига кўра эса ҳайкалнинг тўртта қисми Бобил, Мидия, Форс ва Юнон империяларига ишора қиласиди. Ҳайкалнинг бир қисми лойдан, бир қисми темирдан бўлган оёқлар ва оёқ бармоқлари — Искандар Зулқарнайн вафотидан кейин иккига бўлиниб кетган Юнон сулоласини билдиради. Бу сулолаларнинг бири Мисрда, иккинчиси Сурияда ҳукмронлик қиласиди.

3:1 Баландлиги олтмиш тирсак, эни эса олти тирсак... — баландлиги тахминан 27 метрга, эни эса тахминан 3 метрга тўғри келади.

3:1 Дурах текислиги — бу текисликнинг қаерда жойлашгани аниқ маълум эмас.

3:3 Бу барча амалдорлар... — орамийча матнда *Ноублар, маъмурлар, ҳокимлар, маслаҳатчилар, хазинабонлар, қонуншунослар, қозилар ва вилоят амалдорлари....*

3:7 Чолғу асбоблари — орамийча матнда *Карнай, най, лира, чанг, арфа, доира ва бошқа чолғу асбоблари....* Орамийча матнда шу бобнинг 10, 15-оятларида ушбу асбобларнинг тўлиқ рўйхати такроран берилган.

3:8 Бобилликлар — орамийча матнда *Халдейлар*, ўша вақтда Бобилликлар шу ном билан ҳам аталарди.

3:25 илоҳий зот — орамийча матндан сўзма-сўз таржимаси *худолар ўғли ёки Худо ўғли*. Бу ибора самода яшайдиган мавжудотларга, жумладан, фаришталарга нисбатан ишлатилган. Шу бобнинг 28-оятида мана шу кимса орамийча матнда фаришта деб айтилган.

4:4 афсунгар — орамийча матнда *Халдейлар*. 2:2 изоҳига қаранг.

4:4 раммоллар — 2:27 изоҳига қаранг.

4:5 ...унинг Белташазар деган исми... — 1:7 га қаранг.

4:5 ...мен сиғинадиган худонинг исми билан ҳамоҳангдир — Бобилнинг бош худоси исми Бэл эди (Мардух исми билан ҳам танилган).

4:5 худоларнинг руҳи — ёки *Худонинг Руҳи*.

4:6 худоларнинг руҳи — ёки *Худонинг Руҳи*.

4:13 еттий иил — орамийча матндан сўзма-сўз таржимаси *еттита муддат*.

Баъзан Дониёр китобида *муддат* сўзи бир йилга нисбатан ишлатилган. Бу орамийча ибора шу бобнинг 20, 22, 29-оятларида ҳам бор.

4:15 худоларнинг руҳи — ёки *Худонинг Руҳи*.

4:16 Менинг тушим...дедим унга мен — ибронийча матндан сўзма-сўз таржимаси *Туш...деди унга шоҳ*. Бу ўринда шоҳ Навуҳадназар ўзи ҳақида учинчи шахсада гапирган. Баъзан шоҳларнинг мактубларида бундай усулдан фойдаланилган. Англашилмовчиликнинг олдини олиш учун мазкур таржимада ҳам мактубнинг давоми биринчи шахс тилидан ёзилган, чунки матннинг бу қисми 3:31 ояддан бошланган шоҳ мактубининг давомидир.

4:25 ...менинг бошимга тушди — ибронийча матндан сўзма-сўз таржимаси *...буларнинг ҳаммаси шоҳ Навуҳадназарнинг бошига тушди*. Шу бобнинг 25-30-оятларида шоҳ Навуҳадназар ўзи ҳақида учинчи шахсада гапирган. 4:16 изоҳига қаранг.

4:26 ...сарайимнинг томида сайр қилиб юрган эдим... — у замонларда уйларнинг томи текис бўлиб, одамлар томга чиқиб дам олишарди.

5:1 шоҳ Белшазар — Навонидуснинг ўғли бўлиб, отаси билан бирга ҳукмронлик қилган. Навонидус Бобилнинг энг охирги шоҳи бўлиб, милоддан олдинги 555-539 йилларда ҳукмронлик қилган.

5:2 Катта бобом — орамийча матндан сўзма-сўз таржимаси *Отам*. Бу сўзнинг маъноси аждод ёки ўзидан олдин ўтган бирор шоҳ бўлиши ҳам мумкин.

Белшазарнинг отаси Навонидус шоҳ Навуҳадназар сулоласидан бўлмаган. Навуҳадназардан то Белшазаргача бир неча шоҳлар ҳукмронлик қилган. Бу орамийча сўз шу бобнинг 11, 13, 18-оятларида ҳам бор.

5:2 ...Катта бобом Навуҳадназар...олиб келган олтин ва қумуш қадаҳлар... — 1:2 га қаранг.

5:2 канизаклар — ибронийча матнда бу сўзнинг маъноси қўйидагича: канизаклар қонуний хотин бўлмасалар-да, хўжайинлари улар билан жинсий алоқада бўлишган. Қадимги пайтларда бу аёлларнинг жиддий қонуний ҳуқуқлари бўлиб, хўжайинлари уларнинг эрлари сифатида бўлган.

5:7 афсунгар — орамийча матнда *Халдейлар* (шу бобнинг 11-оятида ҳам бор). 2:2 изоҳига қаранг.

5:7 раммоллар — 2:27 изоҳига қаранг.

5:7 ...чап қўл вазирим... — яъни Навонидус ва Белшазардан кейинги лавозимдаги одам (шу бобнинг 1-ояти изоҳига қаранг).

5:10 она малика — ёки *малика*, орамийчада бу сўз ёши катта аёлга нисбатан ишлатилган бўлиши мумкин. Матн мазмунига кўра, бу аёл Дониёр ҳақида Белшазар билмаган нарсаларни ҳам билган. Эҳтимол, у Навонидуснинг ёки анча олдин ўтиб кетган Навуҳадназарнинг хотини бўлган.

5:11 худоларнинг руҳи — ёки *Худонинг Руҳи*.

5:12 Катта бобонгиз уни Белтазар деб атаган эди — 1:7 га қаранг.

5:14 худоларнинг руҳи — ёки Худонинг Руҳи.

5:22 ...сиз, эй шоҳ Белтазар, катта бобонгизнинг бошидан ўтган бу воқеалардан хабардор бўла туриб... — орамийча матнда ...сиз унинг ўғли, эй шоҳ Белтазар, бу воқеалардан хабардор бўла туриб.... Орамийчада ўғил сўзи авлод ёки ворис маъноларини ифодалаши мумкин. Шу бобнинг 2-оятига берилган биринчи изоҳга қаранг.

5:25 ...ва ПАРСИН... — орамийча матнда ...УПАРСИН..., маъноси ва ПАРСИН.

5:28 ПЕРЕС, яъни «бўлингган»... Форсларга берилди — орамийча перес сўзи парсин сўзининг бирлик формасидир. Бу сўзниг парсин шакли шу бобнинг 25-оятида ишлатилган. Бу сўзниг маъноси бўлингган демакдир. Перес сўзи орамийчадаги Форс шоҳлиги сўзига оҳангдош.

5:30 Бобил — орамийча матнда Халдейлар, ўша вақтда Бобилликлар шу ном билан ҳам аталарди.

5:30 ...Бобил шоҳи Белтазар ўлдирилди — милоддан олдинги 539 йилда Мидияликлар ва Форслар Бобилни босиб олиб, Белтазарни ўлдиришган.

5:31 Мидиялик Доро — бу хукмдорнинг шахси ҳақида ҳеч қандай маълумот йўқ. Мидия ва Форс давлатларини бирлаштирган Форс шоҳи Куруш милоддан олдинги 539 йилда Бобилни босиб олган эди (1:21 изоҳига қаранг). Шу боис унга Бобилда “Мидиялик Доро” унвони берилган бўлиши мумкин. Ёки бу унвон шоҳ Куруш Бобил худудига тайинлаган ҳокимга нисбатан ишлатилган бўлиши ҳам мумкин. Бу ҳоким ҳақида қадимги Бобил қўлёзмаларида айтиб ўтилган. Дониёр китобининг бир неча жойида айтиб ўтилган Дорони милоддан олдинги 522-486 йилларда хукмронлик қилган машхур Форс шоҳи Доро билан адаштираслик керак.

6:1 шоҳ Доро — 5:31 изоҳига қаранг.

6:28 ...Доро ва Форс шоҳи Курушнинг хукмронлиги даврларида... — ёки ...Доро хукмронлиги даврида, яъни Форс шоҳи Курушнинг хукмронлиги даврида.... Доро ҳақида маълумот олиш учун 5:31 изоҳига қаранг. Куруш милоддан олдинги 539-530 йилларда хукмронлик қилган. Шоҳ Куруш яна Кир исми билан танилган.

7:1 Бобил шоҳи Белтазар хукмронлигининг биринчи йили — милоддан олдинги 554 йил назарда тутилган. Ўша йили Белтазар отаси Навонидус билан бирга хукмронлик қилишини бошлаган эди. Ушбу бобда тасвирланган воқеалар 5-бобдаги воқеалардан аввал содир бўлган.

7:3 тўртта баҳайбат махлуқ — шу бобнинг 3-8-оятларида тасвирланган махлуқлар бирин-кетин хукмронлик қиласидиган тўртта шоҳликка ишора қиласиди. Шоҳ Навухадназар тушида кўрган ҳайкалнинг тўртта қисми ҳам бу шоҳликларни ифодалаган (2:31-35 га қаранг). 2:36-45 изоҳида ўша шоҳликлар ҳақида маълумот берилган. Тўртта махлуқнинг хукмронлигидан кейин, тахтни Худо танлаган инсон эгаллайди. Худо унга чексиз ҳокимият беради, ўша инсон абадий хукмронлик қиласиди (шу бобнинг 13-14-оятларига қаранг). Шоҳ Навухадназарнинг тушида ҳайкалга урилган ва катта тоққа айланган тош ўша хукмдорни ва унинг абадий шоҳлигини ифодалайди (2:35, 44-45 га қаранг).

7:4 Биринчиси...инсон онги берилган эди — биринчи махлуқ Бобил шоҳлигини билдиради. Мазкур оятдаги махлуқнинг қисмати 4:25-34 да шоҳ Навухадназар бошидан кечирган кўргуликларга ишора қилаётган бўлиши мумкин.

7:8 ...уларнинг орасидан ўсиб чиқаётган яна бир шохчани... — шу бобнинг 7-8-оятларида шохлар тахтга ўтирадиган қудратли ҳукмдорларга ишора қиласи. 8-оятда тасвирланган шохча эса Исройл халқининг Худосини таҳқирлайдиган ва ўзини Худо деб атайдиган ҳукмдорни билдиради (яна 11:36 га ва 2 Салоникаликлар 2:4, Ваҳий 13:5-6 га қаранг). Айрим олимларнинг фикри бўйича, тўртинчи шоҳлик — Рим империяси эмас, Юнон империяси бўлиб (2:36-45 изоҳига қаранг), оятдаги шохча Антиох IV ни билдиради (8:9-12 га ва ўша оятларнинг изоҳига қаранг).

7:9 Азалий Нуроний — орамийча матндан сўзма-сўз таржимаси Кунларнинг Қадимгиси (шу бобнинг 13, 22-оятларида ҳам бор). Бу ибора ниҳоятда донишманд ва кекса инсонга ҳурмат билан муносабатда бўлишни билдиради. Бу бобда Дониёр мазкур иборани Худога нисбатан ишлатади.

7:10 китоблар — ҳар бир инсоннинг яхши-ёмон ишлари ёзилган китоблар. Ваҳий 20:11-15 га қаранг.

7:12 ...маълум бир вақтгача... — орамийча матнда ...бир фасл ва вақтгача....

7:13 инсон қиёфасидаги бир зот — орамийча матндан сўзма-сўз таржимаси инсон ўғлига ўхшаган кимса. “Инсон ўғли” ибораси инсонга ёки инсон қиёфасидаги зотга нисбатан ишлатилган (мисол учун, 8:17 га ва ўша оятнинг изоҳига қаранг). Тўлиқроқ маълумотга эга бўлиш учун луғатдаги ИНСОН ЎҒЛИ иборасига қаранг.

7:19 тўртинчи маҳлуқ — шу бобнинг 7-8-оятларига қаранг.

7:25 уч ярим йил — орамийча матндан сўзма-сўз таржимаси бир муддат, муддатлар ва ярим муддат. Дониёр китобида муддат сўзи баъзан бир йилга нисбатан ишлатилган.

8:1 Шоҳ Белшазар ҳукмронлигининг учинчи йили — милоддан олдинги 552 йил, биринчи ваҳийдан икки йил ўтгандан кейин (7:1 га қаранг). Мазкур бобда тасвирланган воқеалар 5-бобдаги воқеалардан аввал содир бўлган.

8:2 Шушан қалъаси — бу шаҳар деворлар билан ўралган бўлиб, вилоятнинг пойтахти эди.

8:3 ...бир қўчкор...Унинг иккита узун-узун шохлари бор экан — икки шохли бу қўчкор бирлашган Мидия ва Форс шоҳлигига ишора қиласи.

8:3 Иккинчи бўлиб чиққан шоҳ биринчисига қарагандан узунроқ экан — узунроқ бўлган шоҳ Форс шоҳи Курушни билдиради. Куруш Мидия ва Форс давлатларини бирлаштирган эди (1:21 изоҳига қаранг).

8:5 ...бир така...улкан бир шоҳ бор эди — така Юнон империясига, таканинг улкан шохи эса Искандар Зулқарнайнга ишора қиласи. У милоддан олдинги 330 йилда бирлашган Мидия ва Форс шоҳлигини босиб олган эди.

8:8 ...улкан шохи синиб тушди. Синиб тушган шохнинг ўрнига...тўртта катта шоҳ ўсиб чиқди — шохнинг синиб тушиши Искандар Зулқарнайннинг ўлимига ишора қиласи. Ўсиб чиққан тўртта катта шоҳ Искандарнинг тўртта лашкарбошисини билдиради. Искандар Зулқарнайн милоддан олдинги 323 йилда вафот этгач, тўртала лашкарбоши унинг шоҳлигини бўлишиб оладилар. Бўлинган бу шоҳликлар Юнонистон, Кичик Осиё, Сурдия ва Миср эди.

8:9 гўзал Исройл ўлкаси — ибронийча матнда гўзал ўлка, Исройл юртига ишора.

8:9-12 Дониёрга келган ваҳийнинг бу қисмидаги кичкина шоҳ милоддан олдинги 175-164 йилларда Сурдияда ҳукмронлик қилган Юнон шоҳи Антиох IV га ишора

қилади. Уни Антиох Эпифан деб ҳам аташарди. Милоддан олдинги 167 йилда Антиох IV Қуддусни босиб олиб, у ердаги деярли ҳамма эркакларни қириб ташлади, аёллар ва болаларни эса қул қилиб олди. У яхудийларга қўп зулм ўтказди, уларнинг эътиқодини йўқ қилишга астойдил уринди. Суннат қилиш одатини тақиқлади. Ўзини кўкларга кўтариб, Худога тенглаштириди, Қуддусдаги Маъбадни булғади (9:27 нинг охирги изоҳига қаранг), кунда келтириладиган қурбонликларга чек қўйди. Шу вақт мобайнида имонда собит қолган қўп яхудийлар қурбон бўлди. Милоддан олдинги 165 йилда яхудийлар Антиох IV ҳукмронлигига қарши исён қўтариб, озодликка эришдилар. 7:8 да охирзамон даврида ҳокимият тепасига келадиган муртад бир шоҳ ҳақида ҳикоя қилинган эди, Антиох IV ўша муртад шоҳнинг жонли намунасиdir (7:8 га ва ўша оятнинг изоҳига қаранг).

8:14 2300 кечаю кундуз — буни 2300 сутка деб тушунса бўлади ёки 1150 кеча ва 1150 кундуз алоҳида ҳисобланган ҳолда, 1150 сутка деб тушунса ҳам бўлади. Иккинчи талқин қуидаги сабабларга қўра, мантиққа тўғри келади: 1150 кун 7:25 да айтиб ўтилган уч ярим йилга teng. Қурбонликлар кун давомида икки маҳал, эрталаб ва кечқурун келтирилгани учун, кеча ва кундуз алоҳида ҳисобланган бўлиши мумкин.

8:17 инсон — ибронийча матнда *инсон ўғли*. Бу ўринда шу ибора пайғамбар ҳам одам зотидан эканлигини, абадий яшамаслигини, у ҳам Худонинг кучига муҳтожлигини кўрсатиш учун ишлатилган.

9:1 Бобил — ибронийча матнда *Халдей*, ўша вақтда Бобил юрти шу ном билан ҳам аталарди.

9:1 Ахашвераш — Эзра ва Эстер китобларида айтиб ўтилган, Ксеркс исми билан ҳам танилган Ахашверашдан бошқа шоҳ.

9:1 ...Мидиялик...Доро... — 5:31 изоҳига қаранг.

9:2 Эгамиз Еремиё пайғамбарга айтган сўзларига қўра... — Еремиё 25:11-12, 29:10 га қаранг.

9:3 ...қанорга ўрандим, қулга беланиб... — қанор дағал қорамтири мато бўлиб, эчки ёки тия жунидан тўқилган. Қанорга ўраниб олиш ва кулга беланиш умидсизликни ва қайғули ҳолатни ифодалайди. Кўпинча бу ҳаракат Худодан кечирим сўраб ибодат қилиш ва Ундан мадад тилаш билан биргаликда амалга оширилган.

9:16 муқаддас тоғ — Қуддусдаги Сион тоғига ишора. Қуддусдаги Маъбад қурилган тепалик Сион тоғи деб аталган. У ерда Худо Ўзини Исроил халқига маълум қилган. Эски Аҳддаги шеърий парчаларда ва пайғамбарлар битикларида Сион сўзи кўпинча Қуддус шаҳрига ёки Худонинг халқига нисбатан ишлатилган. Тўлиқроқ маълумотга эга бўлиш учун луғатдаги СИОН сўзига қаранг.

9:20 ...Худонинг муқаддас тоғи — Қуддус... — ибронийча матнда *Қуддус* келтирилмаган, қиёслаш учун шу бобнинг 16-ояти изоҳига қаранг.

9:21 Мен уни олдинги ваҳийда ҳам қўрган эдим — 8:16-17 га қаранг.

9:24 етмиш карра етти йил — ибронийча матндан сўзма-сўз таржимаси *70 ta eтти*, 490 йиллик давр назарда тутилган.

9:24 муқаддас Маъбад — ибронийча матндан сўзма-сўз таржимаси *муқаддасларнинг муқаддаси* бўлиб, Маъбадга, Маъбаддаги қурбонгоҳга ёки олий руҳонийга ишора. Қайси сўз ёки ибора назарда тутилганидан қатъий назар, бу

оят “одамлар яна Маъбадда сажда қила оладилар” деган маънони билдиради.

9:25 ...Худо мой суртиб танлаган йўлбошли... — Масиҳ назарда тутилган.

Тўлиқроқ маълумотга эга бўлиш учун луғатдаги МАСИҲ сўзига қаранг.

9:25 етти карра етти йил — ибронийча матндан сўзма-сўз таржимаси *7 та етти*, 49 йиллик давр назарда тутилган.

9:25 Олтмиш икки карра етти йил — ибронийча матндан сўзма-сўз таржимаси *62 та етти*, 434 йиллик давр назарда тутилган (шу бобнинг 26-оятида ҳам бор).

9:26 У эришган ҳамма нарса барбод бўлади — ёки Ҳеч ким унинг ўрнини олмайди.

9:27 бир карра етти йил — ибронийча матндан сўзма-сўз таржимаси *1 та етти*, 7 йиллик давр назарда тутилган.

9:27 Маъбад — ибронийча матндан сўзма-сўз таржимаси *қанот*, Маъбаднинг айни бир қисмига ёки Маъбаддаги қурбонгоҳга ишора қилаётган бўлиши мумкин.

9:27 ...Маъбадда макруҳ бир нарса ўрнатади. Бу нарса қўп ҳаром-хариш ишларга сабаб бўлади — қўпчилик олимларнинг таъкидлашича, бу ҳодиса милоддан олдинги 167 йилда, Юнон шоҳи Антиох IV ҳукмронлиги даврида юз берган. Уни Антиох Эпифан деб ҳам аташарди. У милоддан олдинги 175-164 йилларда Сурияда ҳукмронлик қилган. Қуддусдаги Маъбаднинг қурбонгоҳи устига худо Зевсга атаб қурбонгоҳ қурдириб, у ерда чўчқаларни қурбонлик қилган. Исо қилган башоратга кўра, шунга ўхшаш ҳодиса охирзамон даврида ҳам содир бўлади (Матто 24:15 га қаранг).

10:1 Куруш ҳукмронлигининг учинчи йили — милоддан олдинги 536 йил (1:21 изоҳига қаранг).

10:1 Келажакда албатта содир бўладиган қучли тўқнашувга оид бўлган бу... — ёки Хабар тўғри эди, аммо уни тушуниш жуда қийин эди. Бу....

10:4 биринчи ой — иброний календарининг Нисон ойи назарда тутилган (Нисон ойи Абив ойи деб ҳам аталади). Ҳозирги календарга кўра, бу ой тахминан мартнинг ўртасидан бошланади.

10:5 соф тилладан ясалган камар — ёки Уфаздан келтирилган тилладан ясалган камар. Уфаз деган жой ҳақида ҳеч қандай маълумот йўқ.

10:13 Мен у билан жсанг қилиб ҳаяллаб қолганим учун... — ибронийча матнда *Мен Форс шоҳлари билан курашиб ҳаяллаб қолганим учун...*, оятнинг биринчи қисмida ва шу бобнинг 20-21-оятларида айтиб ўтилган ҳимоя қилувчи фаришта билан бўлган тўқнашув назарда тутилган бўлиши мумкин.

10:16 одам қиёфасидаги бошқа бирови — ибронийча матнда *одамга ўхшаган биттаси*. Шу оядда ва 18-оятда айтилиб ўтилган бу кимса 5-6-оятлардаги зотми ёки бошқами — аниқ эмас.

10:19 Мен биринчи қўрган бошқа бирови... — ибронийча матнда *У....* Бу оядда 5-6-оятларда айтиб ўтилган зот назарда тутилган бўлиши мумкин.

11:1 Мидиялик Доро — 5:31 изоҳига қаранг.

11:2 Фаришта — 10:5-6 да тасвирланган, майин зиғир матосидан тикилган либос кийган фаришта.

11:5 Миср шоҳи — ибронийча матнда *жсануб шоҳи*, Миср ҳукмдори назарда тутилган (шу бобнинг 8-оятига қаранг). Шу бобнинг ибронийча матнида бу

хукмдорга нисбатан ҳар доим “жануб шоҳи” ибораси ишлатилган.

11:6 *Сурия шоҳи* — ибронийча матнда *шимол шоҳи*, Сурия хукмдори назарда тутилган (тўлиқроқ маълумотга эга бўлиш учун луғатдаги СУРИЯ сўзига қаранг). Шу бобнинг ибронийча матнида бу хукмдорга нисбатан ҳар доим “шимол шоҳи” ибораси ишлатилган.

11:6 отаси — ибронийча матндан. Қадимий сурёнийча ва лотинча таржималарда ўғли.

11:16 гўзал Истроил юрти — ибронийча матнда *гўзал ўлка*, Истроил юртига ишора (шу бобнинг 41-оятида ҳам бор).

11:22 олий руҳоний — ибронийча матнда *аҳд шаҳзодаси*.

11:30 Гарб соҳилларидан... — ибронийча матнда *Киттимдан....* Бу ном умуман йўрта ер денгизи бўйларида, яъни Истроилдан ғарбда яшайдиган халқларни билдириши мумкин. Бу ўринда Римликлар назарда тутилганининг эҳтимоли кўпроқ.

11:31 ...кўп ҳаром–хариш ишларга сабаб бўладиган макруҳ нарсани... — 9:27 нинг охирги изоҳига қаранг.

11:37 аёллар яхши қўрадиган худо — худо Таммуз назарда тутилган бўлиши мумкин. Бу худо Адонис ва Осирис номлари билан ҳам юритилади. Одамлар, бу худо аёлларни серпушт қиласиди, деб ишонар эдилар (Ҳизқиёл 8:14 га қаранг).

11:38 қалъаларни ҳимоя қилувчи худо — худо Зевс ҳақида айтилаётган бўлиши мумкин.

11:41 ...Эдом...Мўаб...Оммон... — Эдом Ўлик денгизнинг жанубида, Мўаб Ўлик денгизнинг шарқида, Оммон Иордан дарёсининг шарқ томонида жойлашган юртлар эди.

11:43 Ҳабашистонликлар — ибронийча матнда *Кушликлар*. Куш деган жой Мисрдан жанубда бўлиб, ҳозирги Судан ва Эфиопия мамлакатларининг бир қисмини ўз ичига олган эди.

12:1 Фаришта — 10:5-6 да тасвирланган, майин зиғир матосидан тикилган либос кийган фаришта.

12:1 Худонинг китоби — Худо Ўзига тегишли бўлганларнинг исмларини ёзиб қўйган китоб.

12:4 ...юз бераётган ҳодисаларни тушунмоқчи бўладилар — ибронийча матндан сўзма–сўз таржимаси ...билим қўпаяди.

12:6 зиғир либосли фаришта — 10:5-6 да айтиб ўтилган фаришта.

12:7 уч ярим йил — ибронийча матндан сўзма–сўз таржимаси *бир муддат, муддатлар ва ярим муддат*. Дониёр китобида муддат сўзи баъзан бир йилга нисбатан ишлатилган.

12:11 ...кўп ҳаром–хариш ишларга сабаб бўладиган макруҳ бир нарса... — 9:27 нинг охирги изоҳига қаранг.